

黃區五部

地60.57

36

218

黃岡縣志卷之二十一

知黃岡縣事宛平俞昌烈編輯

藝文志

詩

唐

赤壁送別歌

李白

二龍爭戰決雌雄赤壁樓船掃地空
烈火張天照雲海周瑜於此破曹公
君去滄江弄澄碧鯨鯢唐突留遺跡
一一書來報故人我欲因之壯心魄

邵齋獨酌詩黃州作

杜牧

黃岡縣志

卷之二十一

詩

一

前年鬚生雪今年鬚帶霜時節序鱗次古今同雁行
甘英窮西海四萬到洛陽東南我所見北可計幽荒
中畫一萬國角碁布方地頑壓不穴天迴老不僵
屈指百萬世過如霹靂忙人生落其內何者為彭殤
促束自繫縛儒衣寬且長旗亭雪中過敢問當壚娘
我愛李侍中標標七尺強白羽八札弓腔壓綠檀槍
風前畧橫陣紫髯分兩旁淮西萬虎士怒目不敢當
功成賜宴麟德殿援超鵠掠廣毬場三千宮女側頭看
相排踏碎雙明璫旌竿幪幪旗燿燿意氣橫鞭歸故鄉
我愛朱處士三吳當中央罷亞稻名百頃稻西風吹半黃
尚可活鄉里寧惟滿困倉後嶺翠撲撲前溪碧泱泱霧曉起
鳧雁日晚

下牛羊叔舅欲飲我社甕爾來嘗伯姊子欲歸彼亦有壺漿
西阡下柳塢東陌繞荷塘姻親骨肉舍煙火遙相望太守政
如水長官貪似狼征輸一云畢任爾自存亡我昔造其室羽
儀鸞鶴翔交橫碧流上竹映琴書牀出語無近俗堯舜禹武
湯問今天子少誰人爲棟梁我曰天子聖晉公提紀綱聯兵
數十萬附海正誅滄謂言大義小不義取易捲席如探囊犀
甲吳兵鬪弓弩蛇矛燕騎馳鋒鏃豈知三載凡百戰鉤車不
得望其牆答云此山外有事同胡羌誰將國伐叛話與釣魚
郎溪南重迴首一逕出修篁爾來十三歲斯人未曾忘往往
自撫已淚下神蒼茫御史詔分洛舉趾何猖狂闕下諫官業
黃岡縣志

卷之二十一

詩

二

宋

寓居定惠院之東雜花滿山有海棠一株土人不知貴

也

蘇軾

江城地瘴蕃草木只有名花苦幽獨嫣然一笑竹籬間桃李
漫山總粗俗也知造物有深意故遣佳人在空谷自然富貴

出天姿不待金盤薦華屋朱脣得酒暈生臉翠袖捲紗紅映
肉林深霧暗曉光遲日暖風輕春睡足雨中有淚亦悽愴月
下無人更清淑先生食飽無一事散步逍遙自捫腹不問人
家與僧舍拄杖敲門看修竹忽逢絕豔照衰朽歎息無言指
病目陋邦何處得此花無乃好事移西蜀寸根千里不易到
銜子飛來定鴻鵠天涯流落俱可念爲飲一尊歌此曲明朝
酒醒還獨來雪落紛紛那忍觸

定惠院夜月偶出

蘇軾

幽人無事不出門偶逐東風轉良夜參差玉宇飛木末繚繞
香煙來月下江雲有態清自媚竹露無聲浩如瀉已驚弱柳

黃岡縣志

卷之三

詩

三

萬絲垂尚有殘梅一枝亞清詩獨吟還自和白酒已盡誰能
借不辭青春忽忽過但恐懽意年年謝自知醉耳愛松風會
揀霜林結茅舍浮浮大甕長炊玉溜溜小槽如壓蔗飲中真
味老更濃醉裏狂言醒可怕但當謝客對妻子倒冠落珮從
嘲罵

次前韻

去年花落在徐州對月酣歌美清夜

去年徐州花下對月與張師厚王子中兄弟飲

酒作蕪字韻詩

今年黃州見花發小院閉門風露下萬事如花不可

期餘生似酒那禁瀉憶昔還鄉泝巴峽落帆樊口

在黃州南岸

高梳亞長江滾滾空自流白髮紛紛寧少借竟無五畝繼沮瀆

空有千篇凌鮑謝至今歸計負雲山未免孤衾眠客舍少年
辛苦真食蓼老境清閒如啖蔗饑寒未至且安居憂患已空
猶夢怕穿花踏月飲村酒免使醉歸官長罵

安國寺尋春

蘇軾

臥聞百舌呼春風起尋花柳村村同城南古寺脩竹合小房
曲檻敲深紅看花歎老憶年少對酒思家愁老翁病眼不差
雲母亂鬢絲強理茶烟中遙知二月王城外玉仙洪福花如
海薄羅勻霧葢新粧快馬爭風鳴雜佩玉川先生真可憐一
生耽酒終無錢病過春風九十日獨抱添丁看花發

徐使君分新火

蘇軾

黃岡縣志

卷之三

詩

四

臨臯亭中一危坐三月清明改新火溝中枯木應笑人鑽灼
不燃誰似我黃州使君憐久病分我五更紅一朶從來破釜
躍江魚只有清詩嘲飯顆起攜蠟炬遶空屋欲事烹煎無一
可爲公分作無盡燈照破十方昏暗鎖

石芝一首

有序

蘇軾

元豐三年載在黃州五月十一日癸酉夜夢游何人家開
堂西門有小園古井井上皆蒼石石上生紫藤如龍枝葉
如赤箭主人言此石芝也余率爾折食一枝衆皆驚笑其
味如雞蘇而甘明日作此詩

空堂明月清且新幽人睡思來初勻了然非夢亦非覺有人

夜呼祁孔賓披衣相從到何許朱欄碧井開瓊戶忽驚石上
堆龍蛇玉芝紫笋生無數鏘然敲折青珊瑚味如蜜藕和雞
蘇主人相顧一拊掌滿堂坐客皆盧胡亦知洞府嘲輕脫終
勝嵇康羨王烈神仙一合五百年風吹石髓堅如鐵

上巳日與二三子攜酒出遊隨所見輒作數句

蘇軾

薄雲霏霏不成雨杖藜曉入千花塢柯丘海棠吾有詩獨笑
深林誰敢侮三杯卯酒人徑醉一枕春睡日亭午竹間老人
不讀書留我閉門誰教汝出簷藜枳十圍大寫真素壁千蛟
舞東坡作塘今幾尺攜酒一勞農工苦却尋流水出東門壞

黃岡縣志

卷之三十一

詩

五

垣古堊花無主臥聞桃李爲誰妍對立鳩鵲相媚嫵開餅藉
草勸行路不惜春衫汗泥土褰裳共過春草亭叩門却入韓
家園轆轤繩斷井深碧鞦韆索掛人何所映簾空復小桃枝
乞漿不見磨門女南上古臺臨斷岸雪陣翻空迷仰俯故人
餽我玉葉羹火冷烟消誰爲煮崎嶇東緼下荒徑姪姁隔花
聞好語更隨落景盡餘尊却傍孤城得僧宇主人勸我洗足
眠倒牀不復聞鐘鼓明朝門外泥一尺始悟三更雨如許平
生所向無一遂茲游何事天不阻固知我友不終窮豈弟君
子神所予

次韻孔毅甫久旱已而甚雨

蘇軾

去年東坡拾瓦礫自種黃桑三百尺今年刈草蓋雪堂日炙
風吹面如墨平生懶惰今始悔老大勤農天所直沛然例賜
三尺雨造化無心悅難測四方上下同一雲甘霖不爲龍所
隔俗有分龍雨蓬蒿下濕迎曉未燈火新涼催夜織老夫作罷得
甘寢卧聽牆東人響屐奔流未已坑谷平折葦枯荷恣漂瀝
腐儒粗糲支百年力耕不受衆目憐破陂漏水不耐旱人力
未至求天全會當作塘徑千步橫斷西北遮山泉四鄰相率
助舉杵人人知我囊無錢明年共看決渠雨饑飽在我寧關
天誰能伴我田間飲醉倒惟有支頭甕

送任伋通判黃州兼寄其兄孜

蘇軾

黃岡縣志

卷之三

詩

六

吾州之豪任公子少年盛壯日千里無媒自進誰識之有才
不用今老矣別來十年學不厭讀破萬卷詩愈美黃州小郡
夾谿谷茹屋數家依竹葦知命無憂子何病見賢不薦誰當
恥平原老令更可悲六十青衫貧欲死桐鄉遺老至今泣頰
川大姓誰能箠因君寄聲問消息莫對黃鶴矜爪嘴

陳季常自岐亭見訪郡中及舊州諸豪爭欲邀致之戲

作陳孟公詩一首

蘇軾

孟公好飲寧論斗醉後關門防客走不防閑過左阿君百謫
終爲賢太守老君閭里自浮沈笑問柏松何苦心忽然載酒
從陋巷爲愛揚雄作酒箴長安富兒求一過千金壽君君笑

唾汝家安得客孟公從來只識陳驚坐

書王定國所藏烟江疊障圖王晉卿畫 蘇軾

江上愁心千疊山浮空積翠如雲烟山耶雲耶遠莫知烟空
雲散山依然但見兩崖蒼蒼暗絕谷中有百道飛來泉滢林
絡石隱復見下赴谷口爲奔川川平山開林麓斷小橋野店
依山前行人稍度喬木外漁舟一葉江吞天使君何從得此
木點綴毫末分清妍不知人間何處有此境徑欲往置一頃
田君不見武昌樊口幽絕處東坡先生留五年春風搖江天
漠漠暮雲捲雨山娟娟丹楓翻鴉伴水宿長松落雪驚醉眠
桃花流水在人世武陵豈必皆神仙江山清空我塵土雖有

黃岡縣志

卷之三

詩

七

去路尋無緣還君此畫三歎息山中故人應有招我歸來篇

過江夜行武昌山聞黃州鼓角

蘇軾

清風弄水月銜山幽人夜渡吳王峴黃州鼓角亦多情送我
南來不辭還江南又聞出塞曲半雜江聲作悲健誰言萬方
聲一概量憤龍愁爲予變我記江邊枯柳樹未死相逢真識
面他年一葉泝江來還吹此曲相迎餞

雙井茶送子瞻

黃庭堅

人問風月不到處天上玉堂森寶書想見東坡舊居士揮毫
百斛瀉明珠我家江南摘雲腴落磴霏霏雪不如爲公喚起
黃州夢獨載扁舟向五湖

次韻文潛

黃庭堅

武昌赤壁弔周郎寒溪西山尋漫浪忽聞天上故人來呼船
渡江不待餉我瞻高明少吐氣若亦懽喜失微恙生來醜巢
覆三豪詞林根抵頗搖蕩天生大材竟何用只與千古拜閣
像張侯文章殊不病歷險心膽元自壯江洲鴻雁未安集風
雪擁戶當寒向有人出手辦茲事政可隱几窮諸妄經行東
坡眠食地拂拭寶墨生楚槍水清石見君所知此是吾家秘
密藏

輸麥行

張耒

場頭雨乾場地白老稚相呼打新麥半歸倉廩半輸官免教

黃岡縣志

卷之二十一

詩

八

縣吏相催逼羊頭車子毛布囊淺泥易涉登前岡倉頭買券
槐陰涼清嚴官吏兩平量出倉掉臂呼同伴旗亭酒美單衣
換半醉扶車歸路涼月出到家妻具飯一年從此皆閒日風
雨閉門公事畢射狐置兔歲蹉跎百壺社酒相經過

蘇叔黨呂知止自許下見訪

張耒

三年齊安看江山可當中原故人面北來塵埃逢故人眼前
却作江山見君似江山定不踈能出吾言世亦無蘇郎下筆
妙無敵呂郎與談驚未識鳳雛驥子未宜輕囊空各有千金
璧贈君錦繡英瓊瑤報我琅玕金錯刀溪毛潢洿未相棄歲
暮與君甘緼袍

久長驛書事

孔武仲

空堂深深閃燈燭羣奴鼾眠聲動屋豆肥草軟馬亦便嚼美
只如蠶上簇天事由來不可量初更月出星煌煌須臾變作
霏霏雨客枕不眠知夜長

自雪堂登四望亭因歷訪蘇公遺跡

陸游

我醉飛屐登孱顏拄杖出沒風烟間三山葱龍鮫鱓靜九關
肅穆虎豹閑幾年金骨煉綠髓此日始得窮躋攀老僊歸侍
紫皇案空有野水流淙潺蜿蜒翠阜圍綠野似嶺非嶺山非
山向來龍蛇滿雪壁雷電下取何時還名花亦已天上去居
人指是題詩處九十一翁不識公我抱此恨知無窮

定惠院已廢海

黃岡縣志

卷之三

詩

九

棠亦不復在安國老僧景滋年九十一自言東坡去黃後四年方生

聞齊安雜詠板成從沈守求印蒙贈

薛季宣

鞅縣西南苙子國使君昭代文章伯氣吞雲夢納東坡心在
江湖輕赤壁月波蕩漾春山色崢嶸洲草芊芊碧政平訟簡
暇居多杖履逍遙神自適到眼風光看如畫罨畫溪邊舊游
者高亭矗立畫不如坐嘯雲屏自天寫使君好客非春申一
夔已足無餘人哦詩五百盡清警立使江山景物新江山景
物古來有前賢相與天長久近來百草漸埋沒賴有此詩為
一剖使君好善人如已鏡板巾箱波遠邁良知何獨此麻城
天下行聞為商起我拘官禁值杭葦跋望亭高衣帶水高唐

想像賦神遊遊客言詩詩信美空書從學穆清風得見異書
人見同解嘲不用潘邠老只在先生指顧中

月波樓

葉適 石林

下林百果春自花屋藏汀陰泉著沙光風膩雪誰安措頰紅
密翠空欹斜愛君樓高出江上百里江山開四向峻屏森聳
遠更寒紋練縈回靜猶浪孤潮夜卷西頭來海門推出冰崖
崑豈知星河遭映奪只使鸛雀常驚猜此村風俗淳且魯接
樹移花今復古勸君種學化兒孫不須擁妓呈歌舞

黃州棲霞樓卽景呈謝深道國正

戴復古 石屏

朝來欄檻倚晴空暮來烟雨迷飛鴻白衣蒼狗易改變淡粧

黃岡縣志

卷之三

詩

十

濃抹難形容蘆洲渺渺去無極數點斷山橫遠碧樊山諸峰
立一壁非煙非霧籠秋色須臾黑雲如潑墨欲雨不雨不可
得須臾雲開見落日忽展一機雲錦出一態未了一態生愈
變愈奇人莫測使君抱酒索我詩索詩不得呼畫師要知作
詩如作畫人力豈能窮造化

元

陽邏堡

傅與礪 若金

微雨瀟瀟濕行李馬頭卽見長江水煙浦明侵白鳥邊風帆
亂入青雲裏望人南北久離居况復今年無素書明日重吟
漢陽樹何須不食武昌魚

陽邏堡

陳剛中

陽邏殘堡高巘岼亂山勢如秋蛇蟠長江西來五千里雪濤
怒濺秋風寒憶昔王師駐江上旌旗百萬騰江干江神俛首
不敢喘鏡光浮碧無驚湍乾坤一統自此始坐見北極朝衣
冠我來蘄陽望夏口彷彿但認煙波竿漁歌數聲起何處白
鳥飛盡青天寬鱣公盈尺不論價翛然一笑生清歡興亡往
事誰復問磯頭石老蒼苔乾津鼓急催渡江去又見曉日浮
晴巒

題赤壁圖

王在中

我昔南游過赤壁會上磯頭訪遺跡吳魏勝負了無聞一曲

黃岡縣志

卷之三十一

詩

七

漁歌楚天碧黃岡遷客峨眉翁道同北海人中龍羈懷得酒
逸興發扁舟夜泛空明中江山如許誰賓主醉挾飛仙夢中
語只將天地等浮漚三國周郎會比數神遊八極空畫圖開
卷彷彿瞻眉鬚清風千古凜如在悠悠目斷江雲孤

月下泛赤壁

周北山

赤壁之山何峻嶒下有江水何清泠天空月出夜寥泚玻璃
萬頃涵秋冰爲問黃州雪堂老巧宦何如遷客好酒酣攜客
夜拏舟憂思都將談笑了劃然長嘯來天風神游八極思慮
空但見橫江露華白舉袂欲挹浮邱公洞簫聲斷潛蛟舞月
下清尊貯千古老瞞當日困周郎千里樓船鬪貔虎烟消水

冷沉戈矛空餘野燐寒沙頭江上寂寞總陳蹟追憶往事懷
風流勝筵到我知幾度感昔視今猶旦暮乾坤何事老英雄
滾滾長江自東去

明

赤壁歌

方孝孺 正學

東夏口西武昌赤壁峭絕當中央奸雄將軍氣蓋世敗卒零
落慚周郎得鱸魚沽美酒孰若黃州蘇子瞻謫向江湖動星
斗噫吁噉曹公氣勢蘇子文章人物銷鑠塵跡荒涼惟有江
水千古萬古共流長

詠赤壁

藍澗

黃岡縣志

卷之三十一

詩

十一

長江西來雨如霧赤壁蒼蒼風雨暮草木猶疑橫槩時塵沙
尙想焚舟處烏林渡口下舳艫曹瞞已料無全吳陣前部曲
走劉備眼前談笑輕周瑜君臣謀合士鼓勇玉帳旌旗亦飛
動樓櫓晴空烟焰高魚龍白日波濤湧荆門牢落駐殘兵野
曠不聞鼙鼓聲戰骨秋埋胡地草捷書夜報石頭城雄圖霸
氣兩消歇地老天荒秋一葉石上殘碑過客題沙中古劍漁
人得漢王祠枕碧山隅諸葛臺荒野烏呼千年忠義出師表
萬古江山八陣圖

題赤壁圖 有序

李東陽

沔鄂而東稱赤壁者不一繪圖獨以黃州不直山水之佳

蓋子瞻二賦爲之增重也

荊州水軍八十萬鼓櫂揚旗下江漢江東將帥誰敢當年少
周郎獨輕難漢家英雄本龍種怒指中原扼雙腕孔明決策
討虜迎誓復深仇起相扞東風吹沙暗赤壁百里旌旗眼中
亂烈焰爭馳疾若星南軍已在中流半黃蓋大呼老瞞走烏
鵲翻飛過江岸攀緣失手勢兩孤一紙軍書萬人散賊兵未
平壯士死猜疑已作蕭牆患唇亡齒寒不自知可惜衣冠盡
塗炭乾坤無情歲月改千古茲山石不爛東坡老翁好奇古
一官遠向黃州竄簫聲入秋木葉空此地經過獨腸斷高歌
扣舷和者誰回首斯人亦凋換奸雄僭竊何足數青史離離
黃岡縣志

卷之三

詩

三

後人看爲君擊節歌此圖却立蒼茫倚長嘆

又

李東陽

磯頭赤壁當天倚下有山根插江底江風不動江水深曾駕
扁舟問蘇子憶昔揮毫載酒時俯視塵寰雙脫屣掀髯一嘯
萬壑空夜叫鼉鼉泣神鬼江山再到已不識異代興亡知有
幾吳強魏走了莫聞萬古乾坤如此水天遣斯人作勝觀賦
成却解驚人耳絕代文章不數公諸家圖畫空相似誰將意
象入寥廓坐覺天涯來尺咫不信人間有卧游高堂素壁波
濤起東莊先生好古客謂我作詩如作史三十年前舊品題
山高水落依稀是老去方懷爲國憂少時誤作談兵喜卜居

未遂頭已白不向東邦定南紀爲公復作赤壁歌莫笑風流
非賦比

題赤壁圖

羅倫 整菴

赤壁一萬丈浮雲黯淡秋崢嶸蘇長公豪氣蓋九州東華塵
土青袍浣摩弄雲海浮虛舟山高月小自今古小人蟲蛆君
子龍虎東風赤壁一炬紅千載曹劉兩坵土我耳不欲聞何
客吹洞簫山林杳冥鳥數悲號風塵瀕洞欲拔腰間倚天劍
陸剗蛇豕水斬鯨鯨手挾南溟鵬足躡飛雲履仰天發長嘯
自把太虛擬轉眼五百年冷菴好畫止菴賦江西二妙世間
無倒腔翻作蘇仙圖橫江孤鶴夢若醒人間軒冕真泥塗

黃岡縣志

卷之三

詩

古

赤壁歌

何景明 大復

老瞞橫槩江之臯眼中吳越一秋毫吳人殼弩來江左江頭
鳴笳晝舉火旌旗飄揚北風前舳艫化作江中烟英雄一去
音塵滅斷水殘山弔詞客白雪堂寒烟草暮黃泥坂下臨臯
路酒酣喚客吹玉簫江風山月不須招昔時霸業那足數鶴
夢悠悠渺千古回首東坡百世人畫圖蒼茫空有神

竹樓

何喬新

黃岡使君文中虎勁氣英英隘寰宇西清東觀莫容身又擁
朱幡守江渚江雲山雨晝冥冥使君對此若爲情驚濤厭見
蛟鼉舞老樹愁聞猿狖鳴平生才名冠當世每吐忠言裨國

是哆咕竊笑奸諂排一身南北長如寄使君知命不解愁竹
樓關起江之隈笑呼斗酒酬前哲風帆沙鳥任沉浮仙遊今
在蓬萊島陳迹荒涼淒蔓草我來不見樓中人自酌寒泉薦
蘋藻

定惠院步蘇公海棠詞韻

邵寶二泉

草堂三間倚林木如魯靈光巋然獨當時坡老賦海棠遂使
荒邱頓超俗乾坤俯仰五百年多少高陵變深谷愛人及物
自古然甘棠在野烏在屋誰將蔬圃一治之彼哉鄙夫徒食
肉今之太守關西豪友盡今人猶未足况逢別駕是同鄉前
日臺端望猶淑登臨弔古每賦詩萬丈紅光吐便腹清標旣

黃岡縣志

卷之三十一

詩

五

逼雪堂雪雅韻還宜竹樓竹我持憲節東南行偶陟黃岡一
遊目高山仰止同此懷如覩魏襄在西蜀雄篇可讀不可和
白雪渺渺天邊鵠一株培植兩侯心酌酒酬公歌我曲願言
折竹作新籬等閑莫遣羝羊觸

贈王稚欽

王廷相

休作梁甫吟發我千古萬古哀大道無徵賢聖隱至今心膽
成寒灰矯矯馮敬通文章擅當代口語成禍胎禁錮老煙海
賈誼才高更少年獻納多在王侯先誰云絳灌不相忌却令
流落長沙天吾宗學士難比數文炳龍鸞氣羆虎不逐長安
齷齪兒低眉覩面求憐取心存匡濟人豪英白日未墮憂天

傾閭闔九門不得入大叫直與蛟龍爭上帝不言闔者怒黑
夜搶落芙蓉城芙蓉城闕隔星辰望美人兮江之濱三閭憔悴
自多事五湖放浪真賢人茫然鼓柁不知遠窈窕遊盡江
南春紫清仙人笑相友不如且樂邱園身君今莫邪尚在無
欲割兕象須吾徒天馬之足果無恙刷雲看躍崑崙都里中
小兒不省事鬪雞賭狗矜頭顱君不見朝歌屠叟稱偃蹇八
十垂竿渭陽岸時來歛作明良師分土營邱未云晚

赤壁歌

王廷相

黃州先生碧霞客畫愛儋州老秃翁風神千古宛相似黑夜
時有精靈通翁昔謁帝蓬萊宮承華承盼玉堂中醉來落筆

黃岡縣志

卷之三十一

詩

六

驚豪雄揄揚堯舜邁國風下直籠歸寶蓮炬退朝騎出天閑
龍一朝飄落天涯去顧影飛蓬悲日暮長歌嘯傲凌楚雲誰
識莊生曠遠處長江流不息高興逐歸潮忽來感激古人事
月明攜客搖輕舸舉頭望明月回橈蕩漣漪綺裘被冷洞天
澗紫簫吹裂浮雲飛浮雲黃鶴不相待明月離離墜滄海長
風吹翁入杳冥二客渺然失所在馮夷水仙波縈紆飛虬作
梁鸞爲車七十樓臺映金闕三千珠黛鑿明珠仙人握手拾
錦花玉田紫芝紛如麻天門空濛流雲霞歸來不覺道路賒
山之壁高嵯峨江之水揚湍波昔人遺跡今人歌舊國已空
鳧雁多大江之篇白日高當時頗望周郎豪橫天叫嘯意難

盡逸興猶能念二喬望瑤臺挹清氛三十六帝不可聞下視
人界空蠓蚊黃金休鑄鴟夷子綵絲空繡平原君何如秋堂
突兀坐此老令人飛灑開心神

鴻輪篇送楚客南歸寄王稚欽

廖道南 鳴吾

鴻輪運元樞鶉曜旋朱明猷蒸蘊隆冒慘贖有客今向河梁
行河梁沂風湍風湍清且淺岸芷汀蘭翠堪舉彈箏擊筑暫
徘徊置酒當歌歌宛轉宛轉歌且柔君昔上都遊春花豔桃
李春心鬱斗牛蓬萊獨謁金銀闕閭闔雙瞻虎豹遊朝趨赤
玉墀暮宿白雲司銀魚金馬相追隨元臺爲奏靈飛曲四照
花含五色芝五芝秀可餐四照渥如丹採花烟圃側採芝雲

黃岡縣志

卷之三

詩

七

林端倏忽青霓隔蓬島栖遲白日生羽翰凌霞長望楚宮陽
楚宮山色摩青蒼三湘時見龜龜出四澤聊羈鸞鳳翔芳渚
浮丹荷松門裊綠蘿牽絲弱藻延蔓縈柯鳧儔鶴侶奈爾何
奈爾歌白紵月挂層峰樹憐爾悠悠獨徃心秋落黃岡半江
雨

憶昔行寄茶陵張內翰

王廷陳

憶昔赤壁張華筵與君共醉長江邊白鳥飛隨金馬客蒼苔
坐嘯赤墀賢豈知雲雨歡不延尊前紅日墮山川予逐白雲
歸楚澤君隨明月上青天中謁聖人獻納爲近臣馬遷石
室羞前史方朔金門見後身鸚鵡洲邊忽分手鳳凰池上頻

回首但使心同各一方何須對面啣杯酒俱稱賦客異升沉
臨風三復白頭吟相如未逢楊得意漢室誰當奏上林

楚岸吟寄牟子

王廷陳

楚岸長楊垂至地百鳥嬌啼春欲醉晴絲冉冉墮碧空風光
頗爲遊人媚我家黃子國君往鄂王城大江東下雲霧接滔
滔應瀉故人情憶初同領南宮宴白馬青袍花映面本期霄
漢并翱翔寧知世路多更變我歸十年前君歸十年後榮華
顛倒若夢中人情翻覆無不有安能願墮甕自今心不開陰
巖積古雪白日何當來我將振衣從子游請君洒掃鸚鵡洲
遲日經行桃竹杖煙波搖漾木蘭舟須令漢水變春酒更遣

黃岡縣志

卷之三

詩

六

大別爲糟邱蛟龍自吟鶴自舞仙人鐵笛沉高樓雷運坐待
明月上翠娥懽飲來沙頭竹林諸賢真瑣瑣高陽酒徒安足
儔吁嗟此會難卽得使我悵望無時休君不見楚宮寂寞臺
殿荒歲歲東風開野棠三閭憔悴行吟處千古猶傳杜若香
丈夫眼底安足計君行采采莫相忘

冬日赤壁宴張水南太史次劉西陂韻

周

在善卿

江閣崢嶸臨絕壁憶昨尋幽此停舶是時春暮落紅稀綠樹
陰陰啼蜀魄未能歸去還復來歲晚山空時序易木落難藏
栖鶻巢水收欲露潛蛟室幸逢朋舊共追游更把塵鞴便拋
擲臺高石級亂峰層徑窄路防高岸坼雨餘凍滑老脚健青

韞尙帶苔泥迹酒酣斜日下江亭笑弄潺湲憇漁石霸業閒
評吳魏爭文章翻賀王蘇謫感時懷古發孤嘯驚起水禽啼
草草老夫心事鳥何知已許漁樵共爭席人生行樂須及時
况乃桑榆暮齡迫請將勲業鏡中看誰復容顏如往昔此時
不飲若醒歸祇聽山禽還笑容

古寺臨江倚山壁四面青峯攢似戟勝地偏娛康樂情絕巔
不禡昌黎魄忽逢知己玉堂仙一別年光幾流易尋幽選勝
復相同先謁靈祠後禪室良朋眼底不多遇美景尊前肯虛
擲細柳衝寒眼欲舒甲梅迎氣腮先坼回首英雄萬古前鳥
去長安杳無迹唯有坡翁賦中景耳得聞聲目成色山川風

黃岡縣志

卷之三

詩

九

月總堪憐劇喜宦遊非貶謫茲辰况復際明時海內昇平寢
兵革哀絲急管且須聽祖席離腸漫嫌迫感君臨別情未忘
促膝綢繆話疇昔應念天涯老故人十年尙在窮途客

冬日赤壁次韻

應大桂

公餘置酒登石壁騶從放歸閑檠戟半酣散步橫鶴亭下臨
絕壑駭人魄春深草木盡敷榮日暮牛羊俱辟易清江一道
浸寒空修竹千竿映虛室回首城隅新月升浮生光景如梭
擲歌殘莫遣管絃停醉後真疑天地坼眼前風景只依舊高
人何處尋行迹良宵相遇不盡懽桃李應笑辜春色丈夫襟
懷貴澹蕩那論飛騰與遷謫慙予守土五月餘利猶未興弊

未葦偶因張子欲朝天暫撥塵縈陪祖席才微自合返故廬
况復萱堂蔗境迫覽勝渾忘主共賓感時還慨今非昔官事
相仍苦不休明朝又作遠行客

黃州逢張體信大行邀飲赤壁別之短篇

陳宗虞

昔爾作賦吳王臺西湖桃李不敢開我一見之歛飛動撫掌
呼爾班揚才走馬還空冀北羣天街唾手揮青雲星槎一日
浮江漢洞庭黃鶴生氣氤氳西來行路迷芳草豈謂相逢齊安
道赤壁翻開歌舞筵百壺爲我攄懷抱懷抱悠悠笑此身文
犀薏苡爾能明掉頭覆手何爲者青蠅貝錦喧謗聲世事籠

黃岡縣志

卷之三

詩

三

鶴樹榛棘華駟拳跼鳳艱食男兒六合無相知安得攢眉自
摧抑去去高江隨片帆濯纓洗耳巴山巖當筵盡脫魚腸綬
白眼青天竄佞讒江東雲渭城雨交情儘使傾今古楊朱泣
楚狂歌逢君不醉將如何君不見赤壁磯頭一片月曾照英
雄血戰時英雄已銷明月在煙波浩渺令人悲分明感激眼
前事莫向人間間奕棋

王行父爲稚欽先生從子師事明卿爲古文辭甚工

王世貞

王郎買舟千里來相請開卷珠璣光照地不見竹林狂客阮
嗣宗得見阿咸差足慰武昌以東建詞壇吳叟首歌女捧盤

齊安赤壁一時快郢里白雪千秋寒三閭沉湘九辨作古人
未解今人樂多向維摩乞贈言不二門中無此樂

飲行甫蒼蒼閣醉題

吳國倫

臨臯萬戶充南郭中有詞人讀書閣野客能乘野興來一覽
山川窮二鄂山川佳氣鬱蒼蒼白雲黃鶴遙相將庾亮南樓
隔烟水春申故壘平林塘林塘烟水自今古吳魏分爭誰足武有
酒且醉醉且歌圖麟畫鳳俱塵土塵土從來易誤人偏君閉
閣甘沈淪爲問江鄉幾知已能令此地生精神

赤壁磯漫興

袁文伯

赤壁水落石粼粼我來石上投竿綸灑濱之璜那可釣白魚

黃岡縣志

卷之三

詩

三

吹浪如相徇衡門豪隍寄泌水忘饑豈食河之鯉罷釣浩歌
懷美人美人隔岸拾芳芷會須散步孤鶴洲問我何如壬戌
秋我思東坡月猶昨清風江上同悠悠顧我老非西蜀客沉
淪弗夢長安陌醉餘枕石蝴蝶飛覺來仰見東方白

遊赤壁書懷

邱仁

雲夢南來三赤壁獨此崢嶸如卓戟合沓遙連錦繡林
下俯頭陀石校獵樓船昔此經鏖兵戰壘人猶識武畧應誇
顧曲人遊蹤更憶揮毫客佗僚聊爲汗漫遊夷猶不受擲掄
迺夢裏躡躡道士來舟中枕藉東方白擲金詞賦尙輝煌
水年華易拋擲老我來停問石槎探竒一著登山屐醉邀風

月壯幽襟逕指蒙茸悲往迹英雄割據不足道墮地希賢會
一笑酒杯到手是生涯且看滿眼秋山峭

醉中泛赤壁漫興

沈升

東山月出波晶晶有客載酒浮中流琉璃萬頃際空碧白露
橫江澄素秋興來扣舷歌弔古情更傷英雄不盡意流恨與
江長當年曹孟德誰復識周郎舳艫千里來江東張目視吳
吳已空誰知死灰還復煇一霎吹起東南風我愛眉山翰墨
雄豪吟月下疇能同洞簫吹徹楚雲渺滄海一粟看浮蹤魏
氏經營代炎祚不及蘇家一辭賦銅臺舞榭久荆榛落葉紛
紛眼前墮君不見江上月古往今來幾圓缺又不見江中流

黃岡縣志

卷之三十一

詩

三

前人血戰後人遊文章事業總成幻天地萬物皆蜉蝣不如
投却蘇子筆不如折却曹公矛滄海魚已肥甕瓮酒新篋木
蘭之槭沙棠舟但願金尊常盈月常滿夜夜來爲赤壁游醉
裏藏真足爲樂何須更夢臨臯鶴

夏日赤壁登眺

吳良吉

五月落梅吹未殘薰風南來新葛寒濯纓石邊水半落策杖
樹底重雲蟠鷗鳧出沒下前渚蛟鼉鳴吼飛驚湍風前有酒
載蘇子月下無枝羞老瞞英雄至今生感慨功業未就詎能
安披襟對客已忘世放筆寫詩殊盡懽高懷已許寄墨跡開
口立譚披鐵冠層樓不盡登臨意可笑元龍眼孔寬

由龍山登兩耳山至赤壁作歌

王一鳴

聚寶山南一尊酒主勸賓酬不離手夜深霜露沾人衣
淋淋長江峽中吼兩耳山高連石肘發興攜壺作狂走
風逆難聞童稚呼雲迷翻訝藤蘿陡路細石古狐狸啼
絕頂蒼茫一翹首班荆度地當開筵舉杯邀月呼青天
野燒橫出狐松巔炙酒酒熟西風便明伯耳熱掀長髯
若愚矜持禮法謙叔孝問詩猶細密轟飲恨少東溟
添擡頭一望山巉巖赤壁半墮滄波銜秋浪浩渺動
樓榭天風空濶吟松杉十步五步山出沒東坡先生
祠眼前造次留客何生賢雞酒陸續深林傳雞煮最
憐白玉熟酒行滴作珍珠圓慙慙苦勸上客醉髣髴
便擬

黃岡縣志

卷之三

詩

三

中山眠酒後坐起忘主客吟徧今古呈山川老僧空谷捲清
磬漁子趁月撐歸船酒罷便作城南步鬱盤城郭紆煙霧月
薄如霜紅蓼稀天高慣鬪清風怒吁嗟乎英雄身世多輾轉
今朝且樂樂奈何向平五嶽有消息看我淋漓醉掃青天歌
茅伯符招飲赤壁席間賦

楊師孔

赤壁磯頭一尊酒白龜波心一片月悠悠大醉五百年多少
陰晴與圓缺江山有盡意無窮滔滔一派洗英雄有時載酒
秋月白有時乘風軍火紅乘風載酒成何事霸圖不勾銷一
醉十萬舳艫化作灰兩篇詞賦照天地憶昔周郎大破曹小
喬初嫁氣雄豪老瞞今已隨流水回首東風亦羽毛獨有坡

仙重茲土泛月抽毫駕千古至今詞人幾句詩不弔龍蛇弔
豺虎豺虎食人白日見等閑天地風雲變孤鶴夢回蘭漿舟
仙翁蚤下承明殿不譴仙人壁不高悟來世界等秋毫醜顏
照壁心猶赤彩筆橫江起怒濤吁嗟乎我來赤壁游懷古欽
千秋洞簫聲未歇烏鵲鳴啾啾賓主東南美乾坤日夜浮欲
訪仙翁在何處清風明月一丹邱

龍蟠磯短歌

劉養微

江心古石盤樓閣二月水枯露石脚突兀翻驚象馬騰躋攀
忽與虬龍搏孤根倒插馮夷宮奔濤觸石不敢東波間毒龍
啾啾語出沒無常挾風雨老僧慎莫伐鐘鼓震驚或恐櫻其

黃岡縣志

卷之三十一

詩

二

怒公平渡河公無渡

人日獅子巖訪楚上人雪盈丈

官撫辰

人日雪山去雪深不見人古徑尋之無人破何處人傳獅子
聲聞聲信步步聲處到來聲盡說無生

五日臨臯江行胡去飛邀飲次日移湖閣

官撫辰

輕舟細浪掠江浦江光淡蕩自今古高人遠寄多古心聚客
偏當五月五五月日日氣揚坐深却送寒溪雨把酒對雨
兩相傾無端親故言平生二十年前今日事科頭信步廬山
行白髮何爲不肯放空使風雲變萬狀興酣只任此留連移

就湖心綠影圓昨不安排今此樂江山豈與高人約

赤壁放歌

官撫辰

黃州江上峻嶒壁紅霞煉影空明擊楊柳橫斜出大堤小航
穿處驚浮蠲遠公寒溪西山景倒映臨臯足深省仙人駕鶴
月中來坐深不覺東方炳誰將夢裏畫丹青非色非空形無
形幾片湖光畫不著高懸虛白草元亭泝流光照神明宰政
事心閒聽欸乃畫中有聲君莫聞藐姑射山人未改滄水西
流汾水分堯由何異嶺頭雲隱顯無心天界外此物那堪持
獻君

東坡赤壁

鄭元祐

黃岡縣志

卷之三十一

詩

五

奎星墮地不化石化作盤天老胸臆清禁森嚴著不得半夜
吹簫過赤壁百萬蛟龍不敢聽萬古東流月華白

別易曦侯

錢旃

但看古來盛名下終日坎壈纏其身少陵之言有激耳今於
易子信其真文章日淪失敦龐交道日薄起鋒鱗易子慨然
有憂之願肩重遠迴迷津片語直提秦漢魄晶肝能戰秋露
白手挽狂波歸崑崙一夫不獲如溝瘠力宏心苦神亦知玉
剛珠矇天爲厄才人失意走四方搜奇掖雋聯今昔三年之
前游吳越與余痛哭灘頭月三年之後游金陵兩心默欽翻
成訥燕子磯前千尺濤不能淘盡英雄血桃葉渡頭酒如珠

不能洗盡肝腸熱歌兒畫舫走如狂不能磨盡胸中鐵男兒
有眼今古瑩男兒有手斯世挈百盤百錯百不遇有日風培
看顏頰江干千里文心蕩恨不隨君叫奇絕吁嗟乎別君又
是重午節

短歌贈族弟

萬爾昌

人生髮膚誰能久君曰致身親則否今來未見致身人猶以
全歸資藉口如弟至孝發天懷雙倚高堂奉箕帚忽焉慈氏
罹帖危肺腑難言醫輟手長潛承睫亦依扉兒顧頂踵皆何
有此身原是二人身兒今折肉仍還母枚淚籲天天不聞却
付羹湯佐瀦滫毋也食之倏然愈兒今痛定遑恤後嗚呼世
黃岡縣志

卷之三十一

詩

三

人俛首讀詩書隧中隧外紛好醜誰云忠孝待推移問向詩
書何所取

陶烈女

萬爾昌

楚江西來走千里有石巉巖東如砥應以異人副山川數百
年來有女士女士珍育自陶門曰字于朱永所矢初學織素
聽機鳴亦辨羹湯潔滫瀡忽有堂上歎息聲却向嬌顏不忍
視微聞未肯向前詢側身似道朱家子從前鄭重羞爲言空
嗟年少今已矣迴身解珮檢繡鍼細細剪刀親纖指小時憐
母大憐誰寧憶將心矢白水我心已決願從君多恐有聲難
入耳何妨強語慰高堂訴向羅襦甘如旨昔聞大業託素屏

亦有悲筵空轉徙女也素不嫻詩書違恤我躬備風史千縷
萬緒已分明一心端爲朱家死嗚呼世人誰不妬蛾眉不惜
蛾眉有如此我今作歌勿長言百年間氣猶憐爾

釜粒行

李之泌

吾黃里俗除夕潔釜浮燈祠竈祝歲候迫子半釜中見粒
或嘉或秬或有或無種物各以類應歲之豐歉物之饒乏
微兆於此往往確驗過時視之則隱故人有知有不知者
昨夜家釜浮粒有七圓明肥潤諦視銜蚤秬米無他種乃
爲釜粒行以紀之俾異日採風者收入歲時風俗志亦一
事也

黃岡縣志

卷之三

詩

七

歲畢人家祠竈主斂在厨前淨滌釜冥燈浮水奠中央婦子
嘻嘻祝靈雨明年歲事今宵問皇天后土從來應爆竹聲停
夜將半微陽欲動天心靜一片光明照無翳浮釜晶瑩吐嘉
稔玉糝的皜浮空來自無而有真怪事善敗良楛徵歲功種
物紛應以其類及時候之白粲粲大珠小珠浮水面粒光瑾
璨掌中明諦視詳推儼吹飯兒童競拾安包裹留取他時成
寶玩東家巧造西家闢靈物過時隱不見奇迹由來遇者稀
智或莫測愚多疑老農勤懇修風俗嬾婦張皇問是非造物
空虛善刻畫水耕火耨釜中窺誰知稼穡用天道他時鹵莽
今不肥元旦開門賀獻節東風拂面農心悅

是刻東風俗占歲穩爲言

昨夜釜生粒歷歷秬香白若雪萬寶之成告在秋與與
先期設今年吉卜勝前年東家兒女西家說

國朝

歌贈杜于皇

陳維崧 其年

我昔住治城家近石子岡魏收能弄戟敬則解拍張江東冠
蓋爭輻輳臺下山川本鬱蒼一代清流歸太學六朝豔曲有
諸郎至尊畫坐黃金牀牙籤堆滿中書堂瑤星不動澄少海
二十八宿羅文昌肥牛大肉啖崔蔡輕軒細馬馱班揚中官
赤棒避文士布衣白恰多輝光杜陵二十游京國青春彩筆
增顏色豈惟公等增顏色僕亦翩翩有人識風塵瀕洞羣僮

黃岡縣志

卷之三

詩

天

來華林賓客安在哉杜陵老大不得志頭白只向江頭哀蜀
岡柳絮正堪把逢君揚州古城下揚州酒價不肯低眼看高
樓淚如瀉君不見飛龍廐下諸小兒轟隱夾路青絲騎又不
見東家買得近跛人奴詎受侯家笞天生此輩本俊物爾
曹嗟惜空爾爲

讀葉司城封嵩游草賦贈

朱彝尊 竹垞

客居通路春復冬有如饑鳥仍投籠平生夢寐在五岳垂老
未觀嵩陽峯峯頭玉女定笑我那不控鶴鞭癡龍瓊漿勿飲
良可惜白髮滿鏡徒愁容葉君昔年宰登封莓苔洗字尋石
淙霞梯高高八百丈筍屨踏徧青芙蓉廬巖瀑飛一匹布鐵

梁峽偃千年松仙人十六時相逢閒吹鵝管向明月有時髻
插三花穠漸州俞叟與君往來熟言君愛奇恒未足閒筵爲
蒸玉面狸行樂曾騎雪色鹿測景還登測景臺逍遙宛在道
遙谷偶然長嘯百里聞每遇殘碑三日讀不見囊中金石編
何殊集古歐陽錄崇文門西車轂擊十里黃塵眯人目下馬
尋君道名姓一笑情親爲鄉曲投我嵩陽詠百篇勝聽哀絲
與豪竹近來海內工詩格新城王君最雄獨一見君詩許絕
倫同調由來賞心速君今司城名籍甚栗果少年齊足踞入
門廳事半栽花插架圖書尚連屋作吏如君良不俗閒從巷
北期王君更許高齋醉醪醪巾箱圖畫恣臥遊豈必盧鴻草
黃岡縣志

卷之三

詩

三

堂宿

贈杜于皇

潘耒 次耕

男兒無家復無國六合飄然一孤客客行落落雲出岑其去
無跡來無心山水佳處便淹泊偶然相逢不可尋黃岡豪士
世無偶胸吞雲夢者八九神鷹鍛翮不能飛丹霄碧海將安
歸三十年來泛江舸大塊無塵能著我商山須眉大澤裘遊
戲人間無不可往年訪友揚州城州人喧呼看歲星如雲冠
蓋趨門庭先生酣眠醉不醒醒來洗眼焦山青金焦如螺意
不快一葉翩然下江瀨青邱方壺不可期白龍赤鯉遙相待
我亦汗漫之遐方東髮結交多老蒼惟翁差池未識面江雲

關樹空相望錫山葉脫蠡湖別散步禪房見筇杖性來避地
已經年笑我勞勞逐塵鞅昆明劫火方洞然老鰲扶山波接
天土偶桃仁莫相笑久客會有還山年先生無事但晏眠大
瓢滿酌清冷泉君不見君家杜陵喪家者茅屋秋風淚盈把
揮淚高歌洗兵馬

大江東去

孫錫蕃

蒼煙高寒靜練白大別北條黃河隔岷山南來幾千里夔荆
朝發淮陽夕激流奔湊若朝宗黑水流沙猶西逆天塹誰云
限北南巫山歌風怨楚客黃雲蔽日秋草枯佳人晚蘭在湘
澤我欲崑崙探禹穴披髮採桐山之嶧長將海島挂釣釣汨
黃岡縣志

卷之三十一

詩

三

沒容冥神寂寞手提雲漢倒江流四游升降分潮汐

菊以不落爲德俗傳介甫詩句謂黃州菊瓣落石城作

長歌不知其實無之予適在黃賦君不見一章

顧景星

君不見屈平好奇餐落英

爾雅落始也

宏景晚服仙骨輕黃州句

如鄧州產霜中落瓣皆虛名圓花高懸準天極抱本不離君
子德臨川詩句偶流傳石城老子三太息君不見百榕聯繫
同一根栗大合抱母尚存木名女貞菊女節辭枝墜葉何翻
翻君不見伯姬堂上焚尾生抱柱死原嘗春陵六國時勢去
何人附公子花開花落直等閒色衰愛弛無媼妍薜華朝暮

何足道松柏歲寒真可憐君不見花奴羯鼓環兒舞十二闌
干叫鸚鵡搖落徒傷秋士情飄零祇恨春風苦土甕醜熟青
玻瓈淵明采采循東籬試將百本階前種會看霜華鯁介時
赤壁吟贈操覲文
奚祿貽

赤壁猶然故鄉陌我欲從之行不得江上兜笈幾度煙一片
青春五湖白憶昔魏武西陵營舳艫東接孫劉城覆軍殺將
分九鼎可憐赤伏終憑陵漳河帶甲三十萬百丈銅臺驕際
天叶都切美人巾舞紫玉笛身後孤墳猶上食北風捲斷翠雲
旗七十二處狐狸泣往事今隨漢水流蘇公詞賦踞高樓子
來不見蒿中碣彩毫應動古人愁春秋往復年年似有時還

黃岡縣志

卷之三

詩

三

賦紅霞岫

叶徐切

嘯軒用東坡先生定惠院寓居月夜偶出韻

胡復亨

先生何事夜出門愛此迢迢明月夜緩步平疇曳杖屨蕭然
閒行風露下江邊水雲及岸齊江水滔滔時自瀉玉宇淨洗
浩無垠杳無一物誰相亞新思陡發真清絕和入梅花不庸
借卽令春去不能留剩有清思追陶謝既吟且和詠而歸邁
前路兮反客舍飄飄霞舉興有餘玩味江湖如食蔗坦腹嘯
軒天地寬萬慮盡蠲何所怕行吟澤畔人莫知城上將軍不
能罵

紫蓋歌

樊維城字紫蓋

吳亮思

紫蓋峯高插天起，倒映瀟湘瀉江水。網緼鍾出大英雄，三策天人敷治理。一行作吏無邊幅，謫向上林種桃李。是時瑞燄勢正張，慷慨疏姦名姓揚。詔佐司農掌錢穀，小臣肝膽凜冰霜。君至泉州多惠政，不畏權門親百姓。小兒竹馬快逢迎，太守單車問民病。三載清風六月寒，會無一字到長安。黨人重伺東林隙，海南不得靜波瀾。拂衣歸去攜琴鶴，赤壁東臯戴舊冠。烽火連年思請劍，幾番躍馬復盤桓。舉朝泄沓成何事，紈袴遭逢拜將官。公懷經濟憂天墮，四郊多壘甘同禍。整衣束帶受兵刃，正氣如山死猶坐。君拚一死剖丹衷，身騎箕尾步虛空。摹君忠烈高無極，回首南瞻紫蓋峯。

黃岡縣志

卷之三十一

詩

三

醉後歌贈郭郡侯翔伯

鳳儀

施閏章 愚山

東坡後身今太守，能飲黃州幾斛酒。丈夫五馬二千石，安得風流滿人口。生計曾犁江上田，宦遊用盡囊中錢。公庭草綠東風暖，吏舍人稀白鹿眠。赤壁直從盃底出，橫江坐嘯心茫然。三分戰鬪都已矣，兩賦崢嶸今尚傳。惜哉雪堂成瓦礫，竹樓亦野火。請君莫廢千秋蹟，詩成箕踞無不可。但恨古人不見我。

赤壁舊有蘇公遺像

徐惺

黃州江山天下奇，巉巖矗立烟離披。下瞰百丈臨江陂，青青芳草生漣漪。遠峯隔岸閒相窺，日暮陰晴渾莫期。布帆細雨

輕如絲習習不斷清風吹倏忽晴空月上眉大江照澈映玻璃
世上凡流安得知曠哉蘇公千載思舉盃邀月高吟詩泛
舟來往無停時吁嗟高山流水應如斯東坡先生豈我欺試
問千載之後更有誰萬古風流真在茲

何太守道岑宋別駕牧仲招游赤壁

曹鼎望

江山多勝概難靚如椽筆兩賦題前後赤壁千年屹丙午歲
之冬仲月朔八日舟發漢川口瞬息黃岡理江天雨零零霧
重山形失澎湃湧波濤風勢寒而栗冒雨涉江干握衣躡山
級風雨蝕殘碑遺像儼石室斯地有斯人豈隨煙草畢別駕
自風流太守復超軼秉燭意何長笙歌連香餽噫嘻五侯七
貴何其富轉眼樓臺窟狐兔阿房銅雀何其雄燐燐鬼火泣
西風何如此赤壁千年恒宰宰上下古今理同心一登斯地
者但覺月白而風清水秀而山逸

赤壁放歌

彭心錦

懸巖勢如削光燄當江開厥初造化手闢此何奇哉我來蹠
躑躅山閣捫蘿藉草升石階紆徐一步一回折漸通幽處無
塵埃平生衡嶽慣登躡茲遊歎息令心哀坡公生平歷坎坷
牢騷跡尚留山崖公之官窮窮於詩公之人奇奇於才至今
兩賦光萬丈照我顏色開幽懷青山不改壬戌歲吹簫客去
空徘徊下視江濤在履底御風身漸高崔嵬吁嗟乎我如青

蓮登落雁身挾飛仙遊汗漫恨不攜來謝眺詩仰首長吟問
霄漢又如退之登華山直踏玉女蓮花間垂書痛哭辭人世
凌躡倒影思不還吁嗟乎安得祖龍鞭驅策南岡西山點點
羅列大江間截斷瀾空波濤翻坐令戰艦飛不前我得縱飲
山之巔直與坡老相周旋登虬踞虎隨沿緣胸中塊礪消萬
千

桃源洞

胡珙

我憶桃源人來上桃源路惆悵佇烟寒溪水隨東注子驥當
年未及尋後人碑碣此還樹當時洞中果有人子孫終於何
處住當時洞中若無人姑妄言之曷以故淵明羲皇人自與

黃岡縣志

卷之三十一

詩

黃

羲皇遇一念冥然山水佳閒來寫出深居趣長沙若解此不
作鵬鳥賦汨羅若解此不逢漁父愬我來隨地看雲山若接
高懷與吞吐流水淡宕去桃花爛漫開過眼山川忘時代誰
言不自洞中來

赤壁懷古 二首

金德嘉

蘇公赤壁二賦留雪堂千年雲木空蒼蒼元豐以來一十一
甲子何人江頭月下懷周郎憶昔仁宗手攬公制策云爲子
孫得一宰相於巖廊英宗召試直史館解組僉判來鳳翔奇
才奇才未進用神宗內殿明燭何煌煌太后感愴哲宗泣金
蓮送院此眷都非常人臣遭逢累朝異數有如此安能模稜

脂韋隨剝行丰骨稜稜兼翰藻其直如矢剛如鉅端頭草勅
惠卿竄羣小側目逾鳩張舒直楊畏先攘臂章惇蔡卞之徒
不可當上誣宣仁下衆正元祐黨籍欺天間新法蔓延其禍
至此極甚於節甫亡漢溫亡唐是時我公飄零轉徙到儋耳
樹下得句銘枕柳炎蒸蚤雨蒼顏老回首臨臯歲月真茫茫
滄桑易代已陳迹有客憑弔爲神傷把公詩句歌一闕安得
中山松醪爲公堂下羞壺觴

赤嶠今夜溶溶月猶照先生古時居先生一去雪堂虛何人
堂上夜牛呼斗酒往鱸巨口細鱗之江魚客子洞簫音寂寂
水落石出白露初覽古長沙哀賈傅招魂汨水弔三閭男兒

黃岡縣志

卷之三十一

詩

三五

此身墮地無不可有口莫讀萬卷書筆欲如椽墨爲沼造物
混沌其厭諸先生雪堂注周易忘言忘象已蘧蘧後來上章
道士邂逅先生天上直奎宿徽宗時事玉皇香案之書復何如古
往今來世事不勝數藉手先生天問一起予前有倚馬萬言
李供奉母乃先生異代而同符海涵地負祇如此天之生才
胡爲乎我思古人九原如可作沮溺耦耕爲最樂不然荷鋤
鹿門去採藥

送陳仲夔歸松湖

梁佩蘭 葑亭

君家松湖屋我家仙湖樓兩湖相隔六千里空涵一氣共清
秋其中日月星辰落湖底沐浴吞吐光欲浮琉璃萬頃作詭

譎推出城郭如銀洲就中亦有舩艦舟金沙鷓鴣雪片鷓鴣楊
柳芙蓉種湖尾石房書屋臨湖頭居湖之樂有如此君家松
湖更難儔瞿塘五月峽水至虎鬚一倒沈豪牛江漢之大爭
飛流天地浸灌不可收漁人刺船來沔口取錢賣魚爲生謀
嘉魚似玉玉幾片銀鱗雪鬣光油油霜刀作膾絲縷細宜城
美酒兼可求君也兄弟相唱酬慈母玉杖杖白鳩上壽進酒
傳觥觥君之樂事亦已優我望仙湖歸不得登高遠念勞雙
眸家人望我回湖月幾度垂銀鈎誰知欲行反夷猶羨君歸
旆如飛鷺北方嚴寒青狐裘送君騎馬出白溝尋常相別已
相念况乃一別將歲周我生凡事只任運文章千古夫何尤

黃岡縣志

卷之二十一

詩

三

一官老大意已足但不微巧爲棘猴君年方壯茂遠歎翰林
詞賦動天子八駿一日崑崙邱三生石上自記取聰明冰雪
良有由始爲老生萬卷破不出蓬藿徒探搜復爲閩人少登
第疏勃權相英氣迺黔陽遣戍地北極出入虎豹啼鶴鶴龍
池劫灰會欲盡後歸古佛爲比丘至今清源古寺在廬嶽石
壁彩翠林木稠楊循何人作引導大悲收攝吾欲投得無頭
陀金色具妙相袈娑角濕隨頰秋蓮花香海試幻泡居向坎
井原蛭蝸卽今平原射獵鷹臂韞少年陸博呼采散眼前各
名不相謀與君並馬聯綢繆君行我住心悠悠幽州雪暗衡
嶽霽歸去湖鳥鳴啁啾吾亦何時得歸去嶺上磔角聞鈎鞞

仙湖芳草青可揉仰天四顧歌四愁

老生偶人至此踴揚
循俱仲夔三生事

赤壁懷古

徐梁

東坡何異著者蘇赤壁何常蘇老游滿天月光下斗牛一江
風色浪蜉蝣老瞞霸氣寒烟盡公瑾奇兵野水流惟有雪堂
一斗酒淘盡今古幾多愁暫時寄興臨臯下任吾天地一扁
舟扁舟宛在鶴安在大海秋風吹未休

問水長歌仿盧仝月蝕

呂德芝

爲我致書陽侯與馮夷作惡太甚只恐天難欺去年夏秋漂
沒我田畝十家九家二穗不穫無米可呼雞老弱饑餓展轉
死溝壑丁壯男女顛連傾跛塞路爭流離蒿目一望空村落

黃岡縣志

卷之二十一

詩

三七

剩有子遺三五仰天號泣無涕洟天帝仁恕暫不加爾以硃
殛今來怙惡較乃故態尤甚之嗟我農人枵腹事春作豺骨
土色鼻息如絲吹更復陰霖十旬助爾爲暴虐竈中蛙蚓且
如難爲炊播種平原秔稻萬頃俱頽粟計日奄觀銚艾可以
療朝饑劃然一聲遠近大小隄防俱決裂千畝萬畝浩浩蕩
蕩無津涯更挾妖蛟毒龍與雷電飛濤激浪奔騰澎湃如山
頽人民夜半夢中溺死幾千百安問兒女室廬器用財賄貲
荒灣野蕩鳶鳥相嘯聚殘柯斷梗牽挂浮屍衣傷哉民命何
故如草芥連年殍死今還駢首填沙泥上天好生百計相長
養遭爾作崇傷殘橫暴竟如斯至今憑陵洶湧不肯退魚鼈

闌入城市逐隊相游嬉昨我守土官司設爾祭剝羊割豕清
酒還明粢爾飲食醉飽仍袞如充耳蕩漾午風夕照夜月清
漣漪天一生爾原以潤萬物何事憑威肆虐成阡危况今
聖明天子御極百神懷柔黃河千里澄清時惟爾江流之神
桀鷲不奉法不聞大禹泗州龜山鐵鎖巫支所屠龍之技更
有朱汗漫周處趙昱劍斬蛟螭如折枝更有錢王射潮弩萬
穀鬼神當之亦洞骨與肌如肯悔過卷濤安流地中去穉沉
之祀仍不爾啟以時陳牲犧用是告爾爾其思

孤燕行爲程節婦作

彭士商 衡隄

雌燕義不雙來巢主人阿誰婦孀居漬面啼痕代膏沐痛妾

黃岡縣志

卷之三十一

詩

三八

無夫夫有子趙氏孤兒纔頭角吁嗟乎死者不可忘生者劇
堪傷孤燕底心性宛轉伴共姜燕春歸兮又秋去妾身歲歲
空閨度

冬夜長

爲黃岡周烈
婦張氏作

夏力恕

冬夜長新嫁娘欲暝未暝在夫牀鄰雞初號燈無光殮夫夫
未亡篋內有衣裳夫亡妾先亡門外有橫塘橫塘一入天茫
茫哀魂迸起相翱翔堂上無姑舅目瞽撫兒聽息不可數長
呼新婦已終古翁之幼子叟翁行墓門雙鬼泣寒冰夜夜牽
牛織女星

烈女行

爲歐彝臣女作

徐本仙

歐家有女額垂髮東牀已作徐家榻蟾蜍飽月勢團圓封姨
不教花叵叵柳白鶯黃正早春兒家夫婿初長成可憐黃茅
撲初鶯可憐弱草瘦零丁二豎巧向膏肓結藥下倉公攻不
克氣似晨星乍有無弱雲狼籍無顏色海棠羞日暗藏秋欲
往信之不可得遙分病勢死莫起黯獨傷情而已矣伯姊諸
姑走相勸言語未足近道理寧作秋原霜下草莫作春花樹
上好春花謝彼還開此秋草同根同節死頗疑截耳與斷臂
猶是貪生心未止吾寧尺組赴冥關魂意心神從所使魂意
追飛仗鬼燐黃昏已到夫家門女父男親怪相問此時不信
謂飛魂此時夫命纔一線宛轉倉皇入相唁舉頭一顧乍銷
魂夫命旋亡女不見夫家悻遣女父回始識義亡輿櫬來墓
上黃昏雙宿鳥至今重起青陵臺張雷神劍終當合化入平
津兩龍躍何必會面始情親古人不侵爲然諾君不見照夜
燈炬乍無膏添膏剔炬重相燒又不見楊柳之枝枝方折新
枝還補舊枝缺請君試看籜中竹竹在籜中已有節

舟過陽邏石壁觀龍仁夫書

秦樂天

陽邏磯頭秋水落石壁下瞰蛟龍澗上鑄四字大徑尺傳是
龍仁夫所作我來停舟仰面觀咄咄逼人毛髮寒鐫拔剛斷
出天授排突思話凌宜官風吹雨灑波淘汰信有鬼神呵護
在迄今點畫尚分明更歷滄桑無損壞東望江流如建瓴古

藤陰黑啼湘靈眼中若肯有人搗應勝焦山瘞鶴銘

月夜登赤壁東畊石羽形兩孝廉

陳大章

長江斷岸千仞懸吳楚一氣相迴旋岩前虬虎萬笑兀怪藤
老樹飛相攢窮秋靜夜莽蕭瑟而我支離攘臂乎其間舉頭
不見橫江鶴明月直挂西南天我來吳會山水窟金庭玉室
長留連到此劃然一長嘯運斤五岳輕人寰解衣醉倒呼玉
局平地已作羽化仙燈火熹微人跡絕成樓鼓角聲淒然張
子工文室懸磬胡君授經厨無烟想見夜深耿不寐搜奇角
勝聳兩肩徑擬襍被來問字嚴城咫尺尋無緣寒鳥啞啞棲
復起病眼強合心悵悵明朝握手應大笑定詫老狂殊未痊

黃岡縣志

卷之二十一

詩

四

天寶鹿

陳大章

康熙壬子歲于清端公成龍爲黃州同知駐岐亭野人獲
鹿垂筮獻之其高如馬角而班公命作脯於項間剝得銀
圓重一十七兩鑄天寶二年華清宮七字角下堅徹如瓊
蓋所謂鹿王也公以作帶環佩之友人黃安彭伯常在署
親見其事屬予作歌

輒萃山前烽火起帚星下掃長安裏赤心一夕化豺狼唐家
丸廟皆荆杞夜雨愁埋劍閣雲春風恨滿溫泉水何來決驟
華清鹿萬里中原行不速慣隨花鳥上陽宮親見玉環頻賜
浴彊字深鑄太府金角痕碧沁璫瓏玉未逐仙人上博臺却

遭牧豎充庖肉君不見梨園菊部霓裳舞宏農唱罷來鞞鼓
鸚鵡曾聞問上皇舞馬猶知悲故主秦家宮闕漢家陵千年
幾度生禾黍休將遺事弔開元漠漠寒烟翳平楚

節孝吟

為節母王文
學妻陳氏作

靖道謨

北山松柏凌雪霜千古萬古摩穹蒼造物鍾靈原不偶盤錯
鬱積乃森張淮西大郡有齊安扶輿毓秀自嶠山峻岫峭壁
三千丈諸山都作培塿觀拔地倚天發間氣王氏節母生其
間三歲背嚴父七歲失所恃十四適王家婉婉相夫子結褵
十二年所天又崩圯藐焉七歲孤高堂急甘旨大旱滌山川
農炊無粒米集蓼茹堇茶苦心無此比之死矢靡他艱貞利

黃岡縣志

卷之三

詩

聖

傾否辛勤送往復事居雉鳳振刷錦翼舒幾年晝荻兼劉薦
一日都邑騰名譽衆謂母節宜上請正色却謝不肯居二十
九年素木榻整衣端坐返太虛珠光玉氣寧久閱
天子聞之表其閭蠅霓綽楔峙舊里崎山嶽嶮與之俱人生
要當爭千古時窮節見傳於書滿堂珠翠空塵土笑然嫠婦
今何如

憫青衣張烈婦

劉揚烈

沱泉

劉家義奴名望楚主愛其勤僕得所買來一婢配與渠云是
河南張家女張家有女未字人生長深閨十六春突遭河決
田廬沒米珠薪桂富者貧爺孀凍餒女弗忍嚮身助養心所

允異鄉淪落豈前因時命自安殊堪憫六親斷絕依一天結
稿數月郎歸泉哭聲不停晝復夜比舍聞之都慘然主翁造
勸休如此待覓良家再嫁爾含悲掩泣回以房更深嗚咽覺
漸止日高如何夢未醒主人驚視戶半扃撲窗一見奔駭異
三尺絲懸竟雉經但見涕痕尚滿面週身上下密縫線緊縮
鬢髻易新衣顏色如生渾未變從容就義少人知我爲墮淚
寫哀辭迄今合葬河洲下墓前應長連理枝

王徒洲

鑾

移居高士莊索賦

喻文鏊

席帽歸來幾萬里窮愁著述空山裏有泉可飲曰君子有鄰
可卜曰高士高士無名士益高斯人豈必終蓬蒿少年提槩

黃岡縣志

卷之三

詩

聖

走聞越無諸臺古荒草沒褰衣一作黔陽行銅鼓蠻溪鏗有
聲五年前渡扶胥口蠶子唱歌珠娘酒昨日之日不可留呼
我重登黃鶴樓松喬柱父居上頭富貴不可期神仙那得遇
芝草蘭蕙日應多流水桃花憶前度昨使平頭奴驅我敲鱗
車東野家具今何如大兒持書帙牙籤一一分甲乙小兒眼
如漆不索梨栗索紙筆

竹樓月波樓遺址感王公元之

喻文鏊

先生茲易得小畜雲夢澤南清睡足雙樓一記一題詩消受
官醞月三斛謫居從古多煩憂竹樹煙雲當勝遊蘇占東坡
公占郡至今都道王黃州

敖峯禱雨歌

并序

龍 澍 肅齋

歲丙午官山左平陽春夏之交旱甚沐浴齋戒設壇龍神
廟得雨數次未足也四月二十四日陟敖山頂俯伏哀號
聲淚俱下幸邀神鑒大沛甘霖禾麥俱慶有秋爰作歌以
紀之

平陽之東青雲山雲氣青青山之顏崇朝騰寸空際合岱兮
敖兮澤一般環山古柏皆千尺盤根裂破山中石別有虬松
骨未朽枯藤倒挂倚絕壁壁間佳氣鬱葱葱活水仙源出仙
宮奇峯忽自天外落佳氣猶在半山中峯之巔兮有石屋雲
之君兮常駐宿縹緲不見雲中君烟靄畫出春山綠傷哉斯

黃岡縣志

卷之三

詩

四三

民數適屯三載不見雨傾盆我來撫事煎百慮遺老逐我所
山神蓬跣仰度山之牛畏途巉巖未敢憚攀藤繞樹過鳥道
奇鬼突出當我面旁穿石穴路轉迷但聞山下鳥聲啼此身
恍惚登雲梯不覺身與山峰齊長跪香銷古屋裏神兮憫我
淚不已一聲霹靂邱巒崩滿眼山雲觸石起起看降後一徑
開山雲送我下山來須臾滂沱滿山澗一洗歸路無塵埃雨
玉雨金原非偶涼德之躬亦何有惟神達天天好生鑒此雲
霓望已久神功收斂寂若無依然東峙一峰孤君不見青雲
之山常如此十日一雨自今始

晚過朱醒齋

霞遠

大令墓

太平寺側

王養愚

絲絲神理歸何處來過荒阡幾延竚百里勞塵屈鳳棲一坏
宿草鄰祇樹人生隙影白駒如笑獨零落歎邱墟前輩風流
不可作夕陽回首喚禽呼

倪氏節孝行

陳 沆 秋舫

黃州之南有長圻塲焉江水出其前四十里內其民淳樸而
力田乃有劉氏之女倪氏之婦獨行貞節於其間其父劉文
煊其婿倪文錦兩家居不遠兩小端且整一朝結良媒父老
皆酪酊婿生十六時一病醫不治女奉父命來視疾病者相
向不語但涕垂女來七日婿遂死死目不瞑意可知女念死
者有父母子今死矣誰扶持無子有子是在婦我其爲之服

黃岡縣志

卷之三十一

詩

四

斬齊孝順阿翁與母慈婿之死也一殤耳女乃使之有饋有
養有祭祀三年服除母念女歸望家門淚如雨有姨老矣劇
相憐慰藉頻煩意吞吐女聞其語手塞耳姨奈何而言若此
翻身哭拜父母前出門決絕姑與姊直至五十餘劉公劉母
各八十女乃再駕省親車女死之時乾隆五十有四年苦節
無人知縣官不聞名從子章福爲我流涕而言之章福爲人
亦古貌里中父老稱純孝力田盡養忘其貧祇愛父母不愛
身父死母歿廬厥墳六年之內一晨昏窮冬僵臥深雪裏母
憐兒寒覆以魂夢中抱母不見母往往夜哭驚起村中人鳴
呼忠孝天地理士大夫家愛其名其實有難言者矣今乃得

之農家子清節雙雙一門裏不有至性綱常死愚夫愚婦安可鄙此邦得之光青史作此者誰浣水陳子沆採風使者視此章

紀嚴貞女

劉家麟

黃姑未會景已滅天孫耿耿淚欲絕除却空中孤月輪誰照貞女心頭血貞女糸出富春家幼讀詩書明大節阿爺選婿得喻門繫定紅絲襦未結一夜玉樓天上傾郎君赴名都魂驚此身不能伴郎去有志還當事竟成入門舅姑悲且喜兒死得女兒未死厨下洗手作羹湯娣似長偕供甘旨女貞之葉何菁菁紫荆之樹邀冬榮冥冥天鑒貞女貞一朝阿嫂兒

黃岡縣志

卷之三

詩

五

孿生分得珠光照兩室栽成玉樹森階庭高堂自此含飴樂兒亦聰明能向學巖慈兼盡倍關情離鸞遙慰緱山鶴卽今兒亦成童久父書琅琅能上口鄉人爭羨有餘慶道路聞之齊頌首主持風化有使君闡發幽光字如斗我亦吟成貞女篇採付輜軒傳不朽

謁杜茶村先生祠

徐上鏞 蓉舫

黃岡杜茶村先生少負才氣遭時不偶流寓金陵著書見志歿葬蔣山之側黃人士慕先生之義請於前郡守楊君星山卽先生故居建祠崇祀且詠歌其事以誌勿諼余來守是郡郡人士乞言於余爰書其略綴以短歌

滄海浮雲變莫測浩蕩乾坤老孤客文章志節垂光黃饑鳳
千秋有生色樊川後人茶村翁少鬱奇氣悲奇窮縱橫游跡
半吳楚廓然六合橫胸中晚年歸臥蔣山麓千樹梅花數椽
屋閉門謝絕冠履交一編自伴梅花讀落落風塵孰吾偶合
向林泉終白首一杯鍾阜葬詩人人與青山同不朽風流淪
落二百年辨香梓里欽前賢近來赤壁訪遺址崇祠屹立鄰
坡仙我來展拜頻欽仰變雅遺音誰嗣響鳳凰墩畔白雲飛
髣髴英靈自來往吁嗟乎勝代人文半榛杞廬山合肥今已
矣茶村當時老布衣俎豆馨香乃如此俎豆馨香良有以百
世聞風且興起

黃岡縣志

卷之二十一

詩

四六

潘貞女

龔斗南 小梁

郎命絕淚如血女性烈心如鐵未到郎家與郎訣郎死亦死
死不得郎父郎母肝腸裂賴女如兒長在側九京郎正慰三
年女忽亡彼蒼者天何茫茫道路聞之爲悲傷吁嗟乎潘貞
女有女如此能不死世間誰是奇男子

蘇公暗井歌

朱兆斗 又韓

廣州古寺西泉冷端明鑿成得龜鼎至今嶺南誇勝概不誇
石鼎誇蘇井豈知十有三年前瓢飲可必无天然東坡茨棘
瓦礫處枯草燒出涓涓泉知渠掘汲自何代蛙蚓不飛埋荒
蒼已覺造物非無心留與謫臣相灌溉雨過犁開稻田雲旱

歲好澗青青芹有時腥風被泥滓除蘚洗石石生紋自從量
移汝州去過者一步一回顧梧桐影閣碧雲沉玉檻銀床深
惜護豈必黃州井盡智絕似嶺南結古歡君不見當日匠心
此井水清澄見底沒波瀾

詩

五言律

唐

憶齊安郡

杜牧

平生睡足處雲夢澤南州一夜風欺竹連江雨送秋格卑常
汨汨力學強悠悠終掉塵中手瀟湘釣漫流

黃岡縣志

卷之三

詩

七

黃州

方干

弭節齊安郡孤城百戰殘傍村林有虎帶郭縣無官暮角梅
花怨清江桂影寒黍離緣底事撩我起長嘆

宋

雨晴後步至四望亭下魚池上遂自乾明寺前東岡上

歸二首

蘇軾

雨過浮萍合蛙聲滿四鄰海棠真一夢梅子欲嘗新拄杖閒
挑菜鞦韆不見人慙慙木芍藥獨自殿餘春
高亭廢已久下有種魚塘暮色千山入春風百草香市橋人
寂寂古寺竹蒼蒼鸛鶴來何處號鳴滿夕陽

江上晚步

潘大臨 邠老

白鳥沒飛煙微風逆上船江從樊口轉山自武昌連星日懸
終古乾坤別逝川羅浮南斗外黔府若何邊

臨江亭

晁補之 无咎

古木嘯寒禽層城帶夕陰梁園多綠樹楚岸盡楓林山際豈
為險江流長自深平生何所恨天地本無心

東坡

張安國 于湖

繫船看西日曳杖到東坡暗井蛙成部荒祠鳥作窠老仙騎
鶴去稚子飯牛歌興廢何須問斯文自不磨

元

黃岡縣志

卷之三十一

詩

吳

夜泛赤壁

楊惟中

暫艤清江舸來登赤壁山怒虬松偃映漱玉水潺湲明月尊
前色丹崖戰後顏高城催暮角醉倚棹歌還

明

齊安卽事五首

陶安

初入黃州市蕭然綠樹村刈茅低縛屋剖竹密編門桃李花
零落山川勢吐吞廛民來一二敬喜為溫存

霧雨一城暗梨花三月天空梁春蟻墮疎壁暮蚊穿草密藏
枯井苔荒蝕斷磚開門山色好飛翠落吟箋

江月簫聲遠城春竹色斑天文鶉鳥次地險虎頭關綰綬此

爲郡結茅先對山雨晴聞布穀鬪草未能開
雨過山添色推牕翠撲衣秧隨新水長蝶趁落花飛江近簷
頭掛春從客裏歸沙乾聊可步倚杖綠陰肥
千村新雨過水滿綠苗生蠶麥收成速兵農賦役輕紛紛挈
家室日日到州城訟簡有公暇江山共此清

縱步

陶安

傍市人家聚瀕江草徑遙燕尋曾到屋魚候未來潮訪友聊
乘興扶筇直過橋晚山煙外見重疊翠如澆

蘇子遊赤壁圖

何景明 大復

垂老黃州客高秋赤壁船三分留古跡兩賦到今傳落日寒

黃岡縣志

卷之三

詩

四九

江動青山斷岸懸畫圖誰省識千載尚風煙

贈王稚欽

何景明

王子萬人英詩名少日成驪珠眠自抱天馬傍誰行旅食青
楓改秋吟素髮生過逢見汝意潦倒媿吾情

夏黃岡採古桐製琴四牀見遺

許宗魯

單父君元是鍾期我未如遠傳哀玉片駢集草元居霞影翻
牀豔松聲湧坐虛南薰音久歇遲子一吹噓

江上別夢澤王子

許宗魯

沙岸移星舸雲汀做夕筵水寒風色勁波淨月華妍酒興劉
伶後詩名謝朓先江湖爲別地解纜各淒然

發齊安風雨有作

王廷相 子衡

纔喜風檣順俄驚雨脚斜
過山猶作陣鳴壑已如麻
江動潛蛟室天占上斗槎
不須貪利涉隨意宿汀葭

赤壁感興

方豪

曲磴孤亭抱危崖古木橫
泉聲絃裏聽山翠畫中看
往事悲蠻觸各賢惜羽翰
登臨須拚醉洗琰向清瀾

山莊雜興十首

王廷陳

老夫諳稼穡次第葺園廬
對酒唯田父呼門絕里胥
桑麻經雨後花竹宛秦餘
如此生涯足何勞薦子虛

事去心逾壯年來迹轉孤
濯纓臨漢沔安枕荷黃虞
春澗偏

黃岡縣志

卷之三十一

詩

三

魚鳥秋窻近竹梧出逢鄰叟飲醉情野童扶

避人開石戶覽物坐山堂
湘柚寒增色江蘼晚更香
卜居悲

楚客招隱憶淮王寂寞吾甘守
浮沉念總忘

計拙堪時棄謀生託野人
鶯花無約束木石有比鄰
溪上思

龍蟄林間學鳥伸逢人無一面
語契卽情親

天地一虛舟浮沉雙白鷗
半生從失計萬事不關愁
山月杯

中映江雲几上流狂歌人莫測
吾與屬滄洲

圖坐晴逾麗畦行晚更宜
客從羅逕入自笑葛巾欹
果熟山

禽戀林馴野鹿隨憑欄契
物理衛足頗欽葵

樹古材墟僻江寒邑里秋
過雲頻送目累月不梳頭
廢禮緣

多病求仁未寡尤呼兒問網罟明發上漁舟
葉減山爭出林秋景故偏候蟲喧冷砌過雁影晴川月酌沾
松露風吟雜澗泉何人會幽興寂寂自鳴絃
物換竟誰使朋來非我期曙光隨口薄秋籟入雲悲速婦開
新醞從兒誦古詩自爲眞率飲忘却鬢成絲
蘿軒時散帙苔澗亦垂綸翠竹供詩徧蒼林佐酒頻岫重遲
見旭源曲易迷津早契沈冥理難爲俗子陳

江上贈夏明府

王廷陳

令尹官初試江邦政已成節如秋壁峻心擬石潭清願契烹
鮮理無矜拔薤名操刀知善割愛助亦吾情

黃岡縣志

卷之三十一

詩

五

定惠院宴集二首

王廷陳

石磴接巖屏行行上翠微賓朋花下至雲鳥竹邊飛韶景度
欲盡舊遊存苦稀蘇公何可作今古一沾衣

結侶乘暄出憑高望眼開閭閻深負渚阡陌曲侵臺展席春
雲映歸軒夕鳥催回看遠陳迹相送轉徘徊

遊龍蟠磯寺

王廷陳

巨石表江心花宮傍太陰天寒龍臥穩雲迴雁飛深棟宇飄
明鏡汀洲響梵音慈航向夕渡轉覺戀祇林

宿龍蟠磯寺中

王廷陳

龍象開靈嶼鼉鼉戴法筵石間攢寶樹鏡裏湧紅蓮香氣潭

烟接燈光岸火連禪房風浪逼永夜不成眠

贈張子三峰

張名濟宏治甲子舉人知嵩與清河縣以氣節稱

王廷陳

自遂歸田臥何曾入郭行比鄰稀識面州郡祇知名但結漁樵侶寧關婚嫁情溪潭垂釣處日見白鷗迎

自團江赴黃倏忽望見城郭

王廷陳

野水平侵岸澄江穩放船櫓聲雜鼓吹檣影曳雲烟漫逐羣鷗後俄驚百雉前長風如可假乘夕向遙天

黃州登赤壁亭

廖道南 鳴吾

亭倚石巖開風鳴萬樹哀人閒不知去鳥倦忽飛來江勢平吞閣山形曲抱臺雲林秋色霽真自可幽懷

黃岡縣志

卷之三十一

詩

壘

訪王夢澤園亭

廖道南

蚤謝承明署冥棲小隱園曲亭圍樹密斜圃植花繁江近吟招鶴巖虛臥聽猿卽承宣室召禮樂待敷言

赤壁席上

童承叙

磴曲城邊峻江清檻外浮天花籠佛閣巖竹過人頭摩詰瑤編共文翁綺席留斷雲供徙倚此意更悠悠

赤壁和童內方韻

崔桐

巖壁凌秋淨江煙向夕浮賢豪總陳迹感慨一回頭亭爲披雲起觴因遲月留登臨有餘興酬唱思悠悠

留別王夢澤

崔桐

赤壁迴孤棹黃城別曉雲情懸夢澤子昔是鳳池羣宋玉仍
儒雅周南滯典墳今宵楊柳月江笛不堪聞

送蔡安父之黃州

徐渭文長

安父黃州去乃當中夏時榴花作火艷梅雨爛蠶絲研墨泐
泐燥書窻葉葉吹今朝霽如此別馬快風嘶

月下聽王稚欽彈琴

鄭善夫繼之

昭文鼓綠綺六氣指開流王子梅花思飄飄下隴頭月華終
勝雪商意自成秋今夕西方夢佳人不散憂

暮春共適軒小集

郭鳳儀桐岡

壁峻臨修路亭虛俯近關到籬江漢水隔岸武昌山簿領一

黃岡縣志

卷之三十一

詩

五三

春過壺觴半日閒便須同二客酪酏棹歌還

過問津河

吳國倫明卿

夫子南遊後山川不可名問津千古事環轍至今情雨洗沙
茸淨波吹石髮輕惟應楚孺子下馬濯塵纓

登赤壁有感

吳國倫

風流蘇學士所志癖登臨赤壁雄荆楚滄江見古今石懸官
閣外帆迫女牆陰尚有垂竿者能知戀闕心

柯山園四首

吳國倫

買舟三百里江上見柯山古徑雙橋外方塘萬木閒入門花
石喜留客水雲閒若與王猷共山陰那得還

性僻耽幽勝風雲奈汝何寄情都不淺乘興一相過宛轉看
亭榭陰森坐薜蘿移尊從所適山鳥自爲歌

藜筮開作徑灌木不知年未解亭相錯翻疑地屢遷烹葵支
舊鼎種樹續新編總失干時計端居亦晏然

散步出幽籬羣芳送酒卮隔城巖瀨下近寺暝鐘遲秉燭雲
生榻停歌月滿池不禁酣欲臥敢謂老能詩

冬日遊赤壁

雷賀

城堞瞰江隈危樓雲氣回酒杯吹碧浪屐齒印蒼苔羽鶴橫
空下松鱸入饌來高山應仰止作賦有雄才

同王憲伯再遊赤壁

蔣夢龍

黃岡縣志

卷之三十一

詩

五

江城初雨霽赤壁景逾幽雲歛山疑畫波明天若浮花香侵
麝氣水色浸樓頭覽勝同延賞何妨醉碧甌

八月初五夜集赤壁二首

徐學謨

萬堞凌丹阜千家俯白雲雄圖餘戰伐清籟隔氛氲月色遠
山盡江聲靜夜聞回鑣看斗直懸漏欲宵分

兩賦已陳迹諸公復勝游問年還應戍爲客正逢秋月隱蛟
龍窟風將江漢流爽來重洗杓懷古思悠悠

病後登竹樓詠懷

鄒廸光

一室數椽小憑欄眼自寬井煙籠浦樹扉宇席江湍簾捲南
薰入樽開北海寒人言吾貌瘦從此欲加餐

夏日過定惠院

鄒勉光

不向空門住那知化日長江煙低佛座山翠濕僧房忍草侵
衣碧曇花上屐香跣趺分半榻人境已微茫

王伯固邀遊赤壁

邱齊雲

百折城西路臨江赤壁分經時憂積雨一日破層雲柳色望
中盡漁歌醉裏聞磯頭無駭浪還欲攬斜曛

赤壁

石崑王

樓憑丹嶂起浪作彩虹浮煙斷三朝埃風迴二客舟江渾龍
鬪日山靜鶴橫秋今夕非壬戌何人載酒遊

泊赤壁

車大任

黃岡縣志

卷之三

詩

五

地是烏林舊名還赤壁留獨詢三國事空見一江流風落山
樵地霜凋楚客裘孤舟今夜夢明月冷沙鷗

齊安雨夜思歸

鄧楚望

獻楚傷難遇在陳不可留停雲生遠夢聽雨亂鄉愁芳草客
中路春風江上樓無端羈旅思白髮對滄洲

行白雲山中

王同軌

行父

雨餘林氣靜山晚日光斜野店依孤樹村橋臥斷槎馬嘶遙
澗水犬吠隔林花白首鉏雲耆春風自一家

赤壁樓上同弟綏父陪劉維芳甫集

王同軌

登樓披岫色尊酒暫從君檻集千峰雨窗流滿榻雲魚龍寒

自蟄鴻雁暮爲羣共醉空明上人間世界分

九日同張念茲諸子游赤壁

呂應端

節靈情偏適山登客與同霞收千嶂雨江吼萬帆風倚醉調
沙鶴衝泥仗野童遠峰青未了莫遣暝煙籠

赤壁再泛

祝世祿

水落磯頭石霜林紅欲然重來摩赤壁孤嘯破蒼煙雁下瀟
湘雨人歸雲夢田江山英爽在平挹一尊前

春日書舍八首

王一鳴伯固

雲岫青天上山堂白水邊看花頻過日種樹不知年自咏陪
春酌無管費晝眠誰能悟瀟灑貧病接神仙

黃岡縣志

卷之三

詩

庚

送目高城晚科頭小逕間松筠團野日紫翠共春山座上尊
須滿人間事不關苦憐叢桂發招客一躋攀

邱壑乾坤大漁樵歲月徂長來鄰叟熟爛醉小童扶江漢封
春雨吟哦老豎儒一區潛自隱何必似王符

出門愁磬折用意買盤桓雲澹水城豁天虛風竹寬試兒分
棗栗報客正衣冠事事堪幽絕何曾酒甕乾

近想邾城壘農家雨最霑地寬疎步履圃老信腰鎌趁浪黃
魚脆經時紫蕨甜一尊斟細細身世或陶潛

去國孤臣遠憂時萬事新過雲凭几席迸淚濺松筠匕首纏
星急旋頭望氣真英雄混塵土誰念捉刀人

醒夢移高枕登危送短筇一邱兼一壑爲圃又爲農天晚愁
飛鳥江深想蟄龍怕逢漁父問枯槁近形容

報主身多病逃名計漸知築牆鄰借樹澆竹水乾池割醬收
魚子鈎簾試燕兒柴門有天地幽獨一題詩

過問津河

梅之煥 長公

每過問津處無愁魂自消門閒蟬語寂路古馬塵囂細雨昏
殘碣輕煙卷斷橋耦耕人咫尺來往慰蕭條

同江石鐘勘災二首

茅瑞徵 五芝

楚甸頻多難茲方更疊災停輿問桑海到處覓蒿萊風借炎
蒸奪天舒鴻雁哀撫心吾有感誰屬救時才

黃岡縣志

卷之三十一

詩

五七

同是勤民出非關載酒來穿林全竹覆掃路半沙隕野老烹
葵餉村籬待客開奇言肉食者何術讚康哉

游崎山

茅瑞徵

崎山高不極半嶺看雲低亂石紛排戟飛梁迴作梯天風傳
遠梵人籟出煙谿直擬捫蘿上攀躋境屢迷

如畫亭獨眺

王爾賢

獨倚高亭上環城客往來江搖雲影動風破浪聲開遠樹孤
帆過前汀一鳥回天然圖畫裏長覺似春臺

過問津河

操明德

適楚津猶問維車漲未消江萍空有兆田父竟難招雨色迷

殘碣波聲咽斷橋獨憐吾道在行李共蕭條

赤壁樓春望二首

曹士謨

平原千里日騁望更登樓春到凌崖樹風移上瀨舟殘陽明
峭壁倒影動澄流欲盡林泉勝藤蘿一徑幽

着屐探幽徑微痕翠映苔雲低空野合岸狹遠江迴黯澹初
垂柳蕭疎半落梅遙天下明月清興夜歸來

癸未三月十六夜同樊紫蓋城守

曹士謨

風雨巖城伴相逢咫尺迷暗塗呼爾汝潦徑失東西倍蕪燃
膏費參差列炬齊最憐鈴柝衆露立待聞雞

步放鶴亭

孫應鴻

黃岡縣志

卷之二十一

詩

五

長嘯答空響悲懷萬谷隨澗流松露冷鶴聽竹風吹山靜寒
蛩悅秋深落葉知登高望太古攜手柏皇時

安仁湖卜居

鄧雲程

居然一少伯寓跡五湖邊席挂簷懸月門開水浸天好風吹
暮雨短笛弄輕煙何處蛟龍鬪絲綸滿釣船

輓周忠烈大參

官撫辰

王事賢勞者生前總不羣名非重一死學豈著三軍魄散人

猶憫公勝姬聞難相率死之

忠孤君未聞

當事盡掩公以飾所私

鬼神終莫掩野

史續遺文

過竹篔簹寺

官撫辰

不問當年寺稱名示阿誰行人盡去得得路何之佛古泥
團動光留電影遲沙彌錯相識笑下幾堦墀

寄龍夢先

官撫辰

爾也不隨俗余焉同一心從來身外想偏向病中尋草發故
根綠雲移何處深江流聲不斷應共虎溪吟

同方還青邱過之兒洽遊安國寺二首

王一荔

楚地悲風滿幽蘭采已非尋燈魚市暗訪寺圃蔬肥塔裂前
朝恨經焚過客稀武昌多霸跡臨岸易歔歔
邂逅桐眠侶郊林慷慨行廓寥嗟久宦僻遠歎吾生龍井孤
亭在雪堂舊砌平微君思往緒感不獨山城

黃岡縣志

卷之三十一

詩

王

李坪漫意

王一荔

凋傷鄉國後尚有古泉亭不見浣紗女誰鑄處士銘衆雲飄
不去獨樹亦能青別路惜殘語與夫攜小瓶

同兒洽李坪飲宋小黃家

王一荔

借宿棲方渡攜兒過李坪荒江爭月艷柴壁逗沙明布被依
樽酒書幃接雁聲仰天輸舊願北斗向誰橫

哭汪愧孝二首

王一荔

幾年同隱約終母或隨君片晷行無跡孤心兩不分白頭誰
菽水名士絕聲聞杖畫山雲細秋宵一卷焚
吟醉陶元亮誅哀王景元何人敢僞託惜汝太無年誦秘春

無生

師諸著

人亡肇論成

予閱諸論在師身後

韜光

名

黃御史稍可話

寒食

萬曰吉 允康

東郊明日靜北郭暮煙遲燕不巢新幕花猶戀故枝嬾投分
肉社羞逐鬪雞兒屏絕人間事絲田弔子推

旅感

萬曰吉

上院疎鐘曉閒堦積雨殘澤中鴻未集天下士宜寒種種數
莖髮勞勞一片肝窮途惟仗友應作古人看

寓大士菴三首

萬爾昌 師二

微雨侵晨展循苔接舊畦市囂重砌隔路僻短垣迷瓦石栖

黃岡縣志

卷之三十一

詩

空

難定疏花徑欲齊老僧忘世久澹對肯招攜

野翮尋知倦蕭然息此菴來雲窺曲牖迎旭逗重嵐密篠依

巖靜羣蜂趁葉貪隨行會所適閒退倚孤龕

待暝閒扉閉春融氣若澄孤光涵靜夜遠塔湧諸燈幽意生

虛照空堂暗倚憑素甕供坐久竹露夕層層

江上逢王子雲

萬爾昌

江上逢人少崎嶇見老生聞知越嶠往只等看山行語習先
朝典詩求異代名如何攜壯子曾不話躬耕

七月十五歸自黃州夜泊趙磯

萬爾昌

斷岸沿江路維舟信所安風連葭影靜月偪水光寒盃冷呼

猶數更深語未闌幾朝慙襤襪贏得此宵寬

季夏留何元方南漪

杜 鈺

訊渡晨光爛維撓岸草斑層波踏不沒流影射常閒風動微
侵席雲歸遠在山論文佐清供破睡不須刪

邢孟貞過黃州有作見懷感答

杜 濬于皇

長江日夜流江岸有黃州是我十年夢輪君一日游山從樊
口密月對武昌愁處處邀篇翰殘黎豈解酬

哭李鄴仙李著有
風知錄

杜 濬

事後論人品無如李鄴仙留身惟賣藥有子只耕田學道知
原夙安貧力更堅白雲山下路誰表少微旣

黃岡縣志

卷之三十一

詩

空

次團江

無名氏

下馬團江濟烏林舊戰場楚弓沙月白吳壘戍雲黃鑑影涵
天遠襟流束地長江聲疑有恨如欲訴興亡

晚泊黃州

無名氏

赤壁雲初暝烏林日漸紅波搖兩岸火人語隔江風夢鶴侵
蝴蝶燃犀逼水宮天寒遊子意清夜月明中

國朝

偶題文昌閣

劉子壯

常閒真似旅為累祇因官才盡方知拙貧長漸得安門深巢
鳥偏庭靜落花寬良友能煩過相忘不着冠

赤壁詞賦重黃州三楚經行徧春來倦遠遊

計偕北上次李坪驛別家兄暨怡西昆季二首

葉封并叔

行行此揮手能不作銷魂相送只垂淚孤征寧可論江聲趨
故里客夢待荒村尚藉壺觴立銜杯未忍吞

行色誰云壯羈愁獨自經已難辭骨肉况復去零丁沙氣蒸
燕路寒雲暗楚汀江楓祇數葉霜淚下離亭

秋病

葉封

幽壑常相見茅齋久在茲梁泥傾燕壘梧葉碎蟲絲愁覺秋
聲早饑嫌穡事遲苟安非得計戎馬欲何之

黃岡縣志

卷之三十一

詩

壘

琴臺詩

三江口在樊口西南三十里或云古琴臺地

葉封

高秋憑一哭云是楚琴臺江樹空無際蘋花冷不開捐軀原

世節

夫人父友軒公以建白顯名舅逸求公殉難

遺珮動今哀有鳳孤飛遠年年

夢屢回

飲茶村精舍

熊賜履敬脩

春陰吹不散此日恰新晴劇飲予非醉狂歌子獨清消祛塵
俗慮想見古人情飽德非虛語如蘭句已成

春亭對雨柬于皇

熊賜履

草堂花意近風雨亂春晴修竹搖空冷殘梅入望清烟霞本
故物邱壑自多情鹿鹿胡爲者輸君學晚成

黃州杜退思改號蛻斯其音近而義別索詩為贈

吳偉業 梅村

述志賦秋蟲孤吟御遠風撥皮忘我相換骨失衰翁畫以通
靈妙詩因入悟空杜陵更字說不肯效韓公

中秋諸友小集雨中罷去已復月明起望

樊維翰

邀月期今夕留人坐二更雨方催客去月忽為誰明天意矜
恢復秋光苦戰爭有情還獨酌拈韻失同賡

同杜于皇李大有樊念菴夜集

奚祿貽 蘇嶺

少陵方用拙元亮早投簪詩律當秋警鄉心入夜深鱸魚看

黃岡縣志

卷之三十一

詩

奎

楚味蟋蟀聽吳音衣薄涼風動蕭騷事滿襟

風泊龍口 白虎山名

奚祿貽 克生

白虎連龍口前程十里賒北風爭繫纜荒戍不棲鴉天落雲
垂草江翻水沒沙食鮭何處得寂寞雨三家

三江口

奚祿貽

眾水會夏沔三江趨海門煙寒邾子郭雨暗呂蒙墩避地行
舟少防關舊址存烏啼深樹裏秋色正消魂

立秋郡邸

奚祿貽

炎蒸猶不退節物閱年愁旅食彫菰米僧房蟋蟀秋梧桐飄
漢水烽火暗湘洲久閉蘇門跡還來問竹樓

杜于皇表兄見訪

笑祿貽

不以行藏異來操遠別人艱難如隔世涕淚共雙親
箇裏梅花落江頭燕子新相看在逆旅豈是故園春

輓杜茶村先生

程瑞禴

病足艱難步扶余送出門論詩忘暮雨飲酒逼黃昏
不盡詠諧興頗多肝膽言先生長不死身久在崑崙

舟過赤壁感懷

王承祐

艤舟赤壁下流覽舊山川亭閣皆新構詩題俱昔賢
水天光一色雲樹影同懸不盡登臨興乘風破浪船

赤壁

張仁熙

黃岡縣志

卷之三十一

詩

套

孤城連赤壁高帶大江流魚艇千年事荒祠獨夜愁
天晴堪去雁水落正芳洲久客經行地蕭蕭蘆荻秋

月夜懷王子雲先生

顧景星

黃公

野水明北郭長林收晚曛尋常來舊雨咫尺賦停雲
涵氣月中白叩舷山裏聞無絲共欣慰愁思遠紛紜

王子雲隱居廬山過訪清談半日

顧景星

只愁歸不易歸後轉饑寒知己十年別貧家一飯難
白頭仍避地遠害肯投竿孰是鄧文子能令王憲寬

屢辭徵辟

泊長圻瘴風雨

顧景星

泝流緣訪舊機棹復如何身世浮泡外江湖夜雨多
濤聲來

枕上橈響有漁過金錯囊全罄中宵獨寤歌

陽進大士閣

顧景星

香磴倚巖阿雲根臥薜蘿長江迴地軸高閣入天河繫纜驚
湍少扁舟乘輿過聽鐘夜方半何處起漁歌

馬鞍山迷道就飯田家

顧景星

紆迴路復迷複嶺萬松齊有舍有樵徑無山無鳥啼斷橋扶
野葛履石渡危溪寒食農家飯分餐過午雞

客樊憲副亢宗延坐園亭二首

劉醇驥

問業西樓竹亭開洞壑光寒山風雨樹倦客古今牀石登敲
詩細松欄倚嘯長折麻誰獨契耆舊本江黃

黃岡縣志

卷之二十一

詩

二十七

蕪園具風雅門閉更幽清止酒知心靜添書畏眼生長江奔
樹色萬井避秋聲閣外崖陰夕彈琴意未營

樊憲副席上贈王子雲二首

劉醇驥

羣彥推王粲雄人舊藝林書多傳劍履地少種桑陰江海短
秋鬢知交剩此心到門車馬客無暇問懸琴
良會堪遺俗聲名老未忘主賓答鼓天地失風霜燈動壁
衣舞秋濃井葉香共來高邁侶誰厭阮生狂

元日諸公攜具招飲聚寶山

鄧之愈

夙性耽山趣貧來費未齊諸公不棄置元日肯招攜草刈行
厨集壺乾信步題因看人影亂舍北又相溪

江樓卽事

王封滌

偶能逢愜意茶熟客來初知有盧仝癖因簪陸羽書物情開
處辨世味淡中餘簷日翩翩下休言駕去車

自聚寶山步至復宏菴

王封滌

濟勝乘方暇登高仗有秋節勞從緩步適景卽凝眸雨後山
容改風來草意柔載歸僧舍裏閒坐問林邱

宋賢祠題壁四首

宋 犖 牧仲

地據黃州勝祠尊宋代賢崢嶸新畫棟疏鑿舊清泉一院松
筠茂千年俎豆虔扶筇同老衲憑弔向春天

遂與羣賢遇依稀杖履傍樓成名不朽道在黨何妨吞墨傳

黃岡縣志

卷之二十一

詩

宋 犖

蛙口留書解橐裝江山相映帶今古鬱蒼蒼

一片池邊石傳來文敏書披尋從瓦礫光彩重璠璣勝賞晨
昏得傷心戰伐餘游人談赤壁風景定何如

移徙堂亭上飛梁結構半萍香飄曲檻鳥語出天桃文彩蘇
門盛聲望楚地高臨風添嚮往行矣寸心勞

望龍碛磯

宋 犖

孤嶼排空起波濤萬頃連蛟龍留窟宅殿閣自江天法鼓聞
山縣神鴉送客船沙頭閒極目斜日起蒼烟

步宋賢祠題壁四首之一

王澤宏 吳廬

石橋烟樹外蘭若雨花旁地近城偏靜官休隱不妨蔬齋同

野初書史屬歸裝宿世君來此山川尚鬱蒼

贈周櫟園

王澤宏

虛堂披豁久靜氣若山深家剩千秋史身存百折心著書忘
歲月積畫當登臨舊恨渾無憶怡然託素琴

歲在壬申岡邑瘠旱公賑已畢民猶有饑爰歷鄉墟勸
好義者捐貸至諸生易為秦家論作領袖因贈以詩

王輔

匹馬寒山裏村墟一一過鴈鴻飛漸集鳩鵲餒猶多無術慚
為守相關望匪他秀才天下任桑梓誼如何

秋夕湖上

於心匡

黃岡縣志

卷之三十一

詩

六

長嘯柴門外行居影自從晚風來爽氣野水度疏鐘壁古蟲
因穴沙寒雁少容宵闌人未臥殘月尚臨峰

暮秋過白沙灣

於心匡

赤壁遠三里白沙第一家徑橫彭澤菊籬掛邵平瓜祇覺風
吹面安知露濕靴傾來茶碗數巒岫散朝霞

赤壁秋雨

彭一卿

清秋臨赤壁細雨濕空堦野樹迷山翠江風鎖岸霾行舟停
畫舫歸路蹀芒鞋罷釣看漁父振蓑立水涯

赤壁晚眺

彭一卿

餘照覆城陰登臨散素襟暮烟橫陌上明練織江心雁陣分

歸路鳥棲返舊林
漁燈依岸晚相對
且聯吟

汨臨臯

宋如辰 斗疑

薄暮臨臯驛
蕭疏客鬢斑
雲端迷夏口
煙際認樊山
噴壑聞鼉吼
投林羨鳥閒
龍湖有茅舍
松月應常關

孟秋客中

王追騏 雪洲

秋飛一葉後
人在萬山中
遠笛荒村月
孤衾野店風
樹衰容自老
蟲細語偏雄
知我今宵夢
蕭蕭北地鴻

遊赤壁

梁斗巖

千秋傳赤壁
屹立俯江根
岸坼波濤險
山高虎豹蹲
文章悲斷碣
風雨拜精魂
我亦傷心客
傾盃掩淚痕

黃岡縣志

卷之三十一

詩

李

陪聶按臺遊赤壁

王顯

覽勝到山亭
雲煙靄畫屏
心丹映壁赤
節勁比松青
呼咄搖河嶽
文章燦斗星
龍魚霑雨露
變化滿江汀

赤壁懷古

胡之太

振衣千仞上江水
自東流吳楚壤相接
孫曹戰未休
臨風悲巨艦
對月憶層樓
望古多遙集
賢名雅好遊

夜發三江口

陳芳烈

日落停橈纜
安流坐可乘
寒汀秋唳雁
遠寺夜飛燈
帆月虛陰度
江霜客面凝
風輕人籟寂
漁火宿孤燈

赤壁

蔡履豫

赤壁古黃州蘇公愛此遊畫船秋色裏明月大江頭斷岸生
龍虎空山臥斗牛至今吟二賦千載認風流

晚泊雙流夾

宋敏道

白石

水落森危石溪流一綫天漲痕高岸迴月影暮山連野燒分
樵徑歸人入暝烟壯心何所適吟望淺沙邊

辰溪道中

宋敏道

叢篠牽危磴枯榕挂女蘿烏言行不得客意竟如何澗道陰
雲合海門煙霧多望中天近遠斜日暮山阿

登武磯山

王鎮邦

峭壁臨磯上江黃一壑分秋高開遠樹清急帶飛雲客笛空
黃岡縣志

卷之二十一

詩

三

山應漁歌隔浦聞情隨流水遠不覺近斜曛

大士閣

王鎮邦

紺閣凭江起風霜老檻楹窻中山翠入足下水雲橫寶樹明
珠火寒空響梵聲千秋巖石上堪亞普陀名

小崎山中

張光壁

斗符

山中日正午雲氣上衣裳花閉空林豔風經隔水香古橋還
歷歷村舍亦堂堂爲性耽幽石逢人笑我忙

秋夜同王叔餘話媿孝山庄

汪國藻

夜靜談初洽露寒秋愈深一庭明月影千載故人心時論忘
追逐孤懷任懸淪更闌還剪燭聊以託知音

登赤壁

汪國深

昨崿臨江路春殘試一登微風吹客舫遠水挂魚罾崖有歸
栖鳥門無識面僧更尋前後賦荒草蔓層層

隳括蘇賦十首

賈 竝

我來登赤壁挾友共凌風山色蒼茫上江流浩渺中幾盤休
洞口一瞬喜天空彼美蘇安往長歌四顧雄

鬱蒼皆抱戶唯少桂千章窈窕出孤壑徘徊周上方武昌疇
自見夏口岸相望白鷺詩成處南遊駕共藏

予懷繆已破羨此半川清千里江陵接長艫落日明秋吹波
驟立風震谷潛鳴葉脫時方肅飛霜凜欲生

黃岡縣志

卷之三十一

詩

三十一

肴核既能攝歲時將亦消何人知屬賦有侶適攜簫目斷幽
蘭嫋襟憑烏鵲飄扁舟今可就婦子託漁樵

徐泛盈匏酌用斯遺世遊踞巖驚虎豹橫架笑蜉蝣名姓海
中粟旌旗江上秋坐來悲孟德西去困荊州

雪掌巉絕地白道識臨臯草木久無主魚鰕各得曹登攀窮
造化俯仰寄秋臺東問黃泥坂蛟宮暮獨高

翩躚元鶴舞餘響應滄龍水降石橫渚山虛月湧松危巢音
真擊鱗木影蒙茸籍酒與登嘯

謂阮籍孫登也

終需二士從

吾衣披羽似吾履御風如放睡倚為枕安行步是車呼樽醜
斗酒洗盞縷鱸魚反笑昔遊者牛山歎逝虛

馮歌誠固耳白飲蓋寥焉

用彈鍊生及醉吟先生傳事

在客乃謀室舉杯

會樂天鹿麋游渺渺山水遇仙仙魚網

紙名

開千尺須留待巨

然巨然僧擅畫

扣舷風細甚光起一輪和正取清聲答不禁良夜過飛星嘗

動酒栖鶴也聽歌小棹輕檣掠薄言歸泝波

隳括二賦詩十首

張楠耕石

予過黃泥坂相從二客閒孤舟凌萬頃明月出東山舉網魚

會得危巢鶻可攀劃然發長嘯人影斗牛間

由廬千里盡一葉駕扁舟浩浩憑虛御飄飄遺世遊霜催木

葉脫風湧大江流是歲杯盤樂無殊壬戌秋

黃岡縣志

卷之三

詩

三

赤壁之遊樂茫然縱所如元裳綈衣鶴巨口細鱗魚逝者未

嘗往流光信有諸惟斯水與月相對識盈虛

有客若無酒如茲良夜何直將橫槩氣都付扣舷歌窈窕美

人遠蹢躅道士過清風江上起無水不興波

東望武昌遠江流夜有聲匏樽來薄暮蘭棹擊空明客有吹

簫者秋從斷岸生偶然相顧笑休問姓和名

行歌互相答直上履巉崖幽壑潛蛟舞橫江孤鶴來山川俱

寥寂天地此徘徊疇昔旌旗影而今安在哉

白露橫江下天光接水光予懷愁渺渺山色鬱蒼蒼崖劃蒙

茸影詩歌窈窕章攝衣還獨立把酒酌周郎

感此蜉蝣寄不知何所終漁樵於渚上枕席乎舟中造物藏
無盡長江羨莫窮飛仙難驟得遺響託悲風
四顧寂寥裏清風動縞衣大江自東去烏鵲忽南飛水落石
仍出月明星漸稀凜乎難久駐步自雪堂歸
正襟危坐久予亦悄然悲十月霜應降東方白不知杯盤狼
籍裏風露復遊時寄謝車輪客從今友鹿麋

對雨懷張涵萬

張楠

尺書容易寫無雁倩誰傳人遠春波外山寒暮雨前別離如
隔世著作各編年頭白期相信長吟企喻篇

白村秋夜

張楠

黃岡縣志

卷之三十一

詩

張

蟲響江樓夕鳴蟬晝不如露生時浸襪葉落欲平除散髮坐
秋夜焚香讀道書涼風有餘好瀟灑白村居

陽邏阻風

孫鏗

晴江入望迴歸路一孤舟風急揮蘆過濤狂挾岸流陰氛迷
落日沙草息驚鷗夜泊荒岑下飄蓬雨不休

夜發陽邏

王心敬

帶月發江鄉歸程爭未央晨雞鳴遠岸畫檝泝流光曉色緣
窻入江風透體涼却憐閒覽勝也自犯星霜

薄暮再抵黃州謁李華西先生祠

王心敬

樊山江外暗赤壁柳邊黃此夜月如畫西州路久荒故人乘

箕尾吾道日蒼涼十載隔生死西風欲斷腸

黃州城北一覽亭

陳大章 仙夢

孤亭如戴笠睥睨出林垌江瀉盤龍影山奔萬馬形荒城圍
宿靄萬井落遙青徙倚飛鴻外狂歌答渺冥

雨中赤壁

王材升

到來將一月赤壁已三過風雨皆詩料江山足笑歌路偏通
鳥道衣好伴漁蓑莫話興亡事豈碑字總磨

晚登赤壁偶成

蔡震升

晚風嘗船首牽纜傍沙洲不惜黃泥滑來尋赤壁遊江山如
話舊詩酒亦分憂鶴夢今宵穩中天月一鉤

黃岡縣志

卷之三十一

詩

七

赤壁重新

王言

闢破嶽崎路平原遶斷垠山橫樊口障柳鎖渡頭春舊日耽
遊客當年作賦人風流賢太守江月一時新

冬日同杜伯穢夜飲赤壁

王子中

峭壁枕北郭危樓嵌水涯蓼花開劫火石岫歛雲霞月起號
羣雁風高落暮鴉遙看半明滅燈火是漁家

赤壁阻風

王世芳

烈風遲客路寒樹寂鶯鳴斷岸霾難辨孤蓬定亦驚催人頻
結纜戒僕莫營鑑相識阿誰在空傳驛外聲

題黃岡廟樓

彭士商

樓迴環春霧牕虛納宿雲甘芳茶鼎沸颯沓磬聲聞鳥喚征
夫夢僧隨野鹿羣無心出世好公事正紛紜

時奉檄盤查黃岡諸鄉社倉穀

自黔中歸果園

靖道謨

于役頻經歲林鴉報客回別當楓葉落歸及柳花開對鏡添
蒼髻循堦長綠苔籬邊舊時菊雨過更須栽

赤壁

劉承啓

獨擅江山勝臨流枕楚黃朝霞生戶牖倒影入帆檣讀賦思
樊口鏖兵重武昌何由起蘇子載詠月明章

暮歸

呂德芝 石素

秋山二十里夕照帽檐紅野寺一聲磬歸驢兩耳風衰年幸
黃岡縣志

卷之三十一

詩

美

小健晚稻喜重豐燈火衡門近飛還倦鳥同

秋泊聞砧

呂德芝

村舍鳴砧急聲聲到客舟長江自東下大火正西流雨露均
維歲桑麻貢有秋鄉關警寒信應爲授衣謀

九日喜周五淑庵田四仲舍見過二首 呂德芝

二子清無敵同過黃葉齋旣因尋菊到何不抱琴來風淡茶
香遠簾空好色開前山可登眺相與計尊罍

餘桂猶堪堪荷尚可危一年記好景老友託清時酒許衰
顏壯秋憐瘦骨知赤龍與白鶴笑爾學仙癡

靖果園先生輓詩

胡紹鼎 牧亭

大用窮經得高言實事餘哲人今已沒論者復何如若祭當
於社將傳信此書顧瞻思往路霜葉曉風初
十五年前別三十里外遊月明廬阜夜木落洞庭秋爾日遲
相問良辰遂不留寄言懷孝子後起見貽謀

赤壁

戴喻讓

未必功成後山痕便劫灰千年無戰伐此地有樓臺夢醒人
俱古天空鶴自回深情吟兩賦江上幾人來

蘇文忠祠

喻文鏊

石農

亭憶臨臯古坡公此滯留江雲明窈窕祠樹足清幽已矣熙
豐事飄然壬戌秋夕陽聊騁目沙鳥滿滄洲

黃岡縣志

卷之三十一

詩

七

歲試黃州較射

鮑桂星

覺生

拂柳旌旗出分花騎隊開角聲從地起山色過江來赤壁風
濤壯黃閒霹靂催挽強兼命中誰是鞅羣材

已卯重九蔣晴山大令招飲覽勝亭時同鄭雪堂閻府
曾古棠二尹易可園廵政錢豫堂少尉

劉興藻

少泉

不上北山頂安知秋氣高孤亭越飛鳥萬里見奔濤烏帽風
頻落青山首自搔驚人應有句笑我負詩豪

仙尹行厨好朋簪聚令辰况逢黃菊酒恰送白衣人
時晴山門人王
緒壇遣逸興忘賓主高歌動鬼神似聞來日別洗酌肯辭頻
人送酒

鴻軒懷張文潛

王乃斌 香雪

一卷柯山集千秋黨籍名死生交誼重得失宦途輕輸麥邀鄰酒浮雲慨帝京欲尋三到處江上雁鴻驚

黃岡縣志

卷之二十一

詩

十六

